



FEBRUARY 2024

VOLUME 64 | NO. 02

Khristian Thukizakna



Khrist toh Kipumkhatna

EDITORIAL BOARD

Editor

Rev. Dr. S. Vung Minthang

Managing Editor

Rev. Thawndoulain

Contributing Editors

Rev. K. Kamchinkhup
Rev. Nenglian Vualnam

Production Managers

Rev. V. Thangkhanmuan
Upa T. Paukhansiam
Mr. Mangthianlal Samte

Circulation Manager

Upa K. Jamchinthang

Design & Setting

Upa Khuplaljem Guite

Lakman:- Kum khat ₹ 150.00;
Dak ah ₹ 200.00; Bu khat ₹ 15.00;
Gamdang US\$ 20.00

CONTENTS

1. EDITORIAL	: 01
2. KHRIST TOH KIPUMKhatNA	: 03
3. PATHIAN TOH KIMPUMKhatNA	: 07
4. PATHIAN THEIHNA (LAISIANGTHOU TUNGTAWN) IN HINKHUA KHENG HI	: 11
5. BIBLE STUDY	: 17
6. GAMMIAL AW	: 21
7. DORCAS CORNER	: 26
8. YOUTH CORNER	: 29
9. DOTNA LEH DAWNNA	: 32
10. REPORTS	: 35
11. EBC INNSUNG THU	: 36
12. THU TUAMTUAM	: 37
13. ORDAIN SUNNA	: 37
14. KIPATHU GENNA/ THUMNA MAKAI	: 39

Thusuah ding piakna:

Editor,
Khristian Thukizakna
Dorcass Hall, P. O. Box - 6,
New Lamka,
Manipur - 795006, India.

*Thusuah sung-a kigente
Evangelical Baptist Convention
Saptuam ngaihdan ahi kim kholkei.
Thusuahte in amau thusuah ah moh a
pawtek ding uh.*

KHRIST TOH KIPUMKHATNA

Amah nuaisiah in a-om a, himahleh akingainiam a, akam aka kei; belamnou goh ding api uh bang leh, belam amulmet mite ma a adai dide bang mai in; ahi, akam aka kei hi (Is 53:7).

Sadhu Sunder Singh kichi India gama Khristiante lakah a theilou omlou dia gintakhuai khop a minthang ahi. Ama' theology, saptuam a etdan, leh Tanchinhoih nna a sepdan pen thutuam hitaleh, Jesu Khrist a itdan leh midangte Jesu itna thu hilh a utdan Jesu Khrist toh kipumkhatna toh kisaiin amah apan ziltuak tampitak om hi. Kum 14 ahik kum 1903 in Jesu Khrist toh kituahna chiantak nei hi. A tanchin kigen tampite laka khat hiai ahi, America a avazin laiin inkuan khat in an anekpih uhi. Sunder Singh apai nungin a tate uh khat in anu kiang ah, "Nu den a i inn ua an hong ne Jesu hia?" chiin adong hi, akichi hi.

Hiai apan sinlai lak dia i deih tuh Jesu toh kinaih Zhou peuh te Jesu bang semsem uhi. Mel-le-puam a kibatna pen thutuam hitaleh Jesu toh kipumkhatte' hinkhua ah Jesu batna them khat bek om teitei hi.

Kingaihniamna: Jesu hinkhua pumpi tuh kingaihniamna hinkhua ahi. A van kumpi thupina teng hon suahkhia, khota nungak khat naubawm hon khel, khualbuk tang zoulou, gan an anpiakna kuang a hong kisial, belamching migentheite kiang pulak masak aom, mikhialte lawm (Mat 11:19; Lk 7:34). Pathian toh kikim a om khelahlou, hong kitei awng, mihing banga hong piang, sihtan pha a kingainiam, hamsia Khros hong tel (Phil 2:6-8). Anungzuite khe silsak (Jn 13:5), mata aom ding zan a athumna ah "kei thu hilouin nangmah thu thu hizaw hen" chiin a Pa khut ah kipe zaw hi (Mk 14:36; Lk 22:42), diklou taka ngoh a om himahleh adikna genlou hi. Isai in "akingainiam a akam aka kei" achi hi (Is 53:7; Mk 14:60,61). Khristiante' Pathian Jesu zaw mihai bang khop hial a kingainiam ahi. Amah toh kipumkhatte mihai bangkhop hiala kiliansak chih a om theikei hi.

Itna leh hehpihna: Jesu mahmah in agen a "Pathian in khovel a it mahmah ziakin a Tapa tang neihsun a pia" a chi hi (Jn 3:16). Pathian hehpihna kilembawlina tellou hehpihna ahi (Jn 1:14). Taksap nei a Amah kiang hon zuan mipite amuh in "alainat mahmah hi" (Mat

9:36). Numei angkawm amatnu uh kiang ah, “Ke’n leng siam louh ka hon tangsak kei; pai inla, tuban hihkhial nawn ke’n,” chi hi (Jn 8:11). Khros lek a a kampau nanungte laka khat “Pa, amau ngaidam in” chih ahi (Lk 23:34). Khrist toh kipumkhat mite’n itna leh midangte hehpih theihna lungtang tua toh kiton a ngaihdam theihna nei uh ahi. Khalam thiltuah thukpipi gen himahleh mahni hinkhua a Jesu muh ding omlou zaw, mahni kikhem ahi (Jak 1:22, 26).

Siangthouna: Pathian nidang laia amite kiang a akilakna ah “siangthou” ka hi chiin ana kigen hi (Lev 11:45; 1Pet 1:16). Pathian tuh “Israel Misiangthou Pa” chi a theih in a om hi (2Kum 19:22; Sam 71:22; 89:18; Is 1:8; 5:19). Siangthouna louin kuamah in Toupa amukei ding” Bible in chi top mai hi (Heb 12:14). Bible in siangthouna agen salam muhtheih siangthouna leh khalam muh theihlauh siangthouna ahi tuaktuak hi. Huaiziakin, sawltak Paul in “Sa leh kha buahna tengteng a kipan ei leh ei i kisiangsak ding uh” a chi hi (2Kor 7:1). Na insung a siangthou hia? Na khotang a siangthou hia? Pathian nei nam ahi uh mite’n ahon chi uhia?

Jesu Khrist a om gige leh Amah toh kipumkhat mite’ hinkhua leh omdan a kilang khe diingte lakah thil thum Bible gente i muta hi. I Hondampa hihna masapen *kingaihniamna* ahi. Amah zuite hinkhua suangphum ding tuh kingaihniamna mah ahi. Abik in tulai i khristianna in a poimoh hiai ahi. Thunuailut mite *dawilok* leh *mihia* banga ngaihna khovel a om i hita uhi. Huaiziakin, Jesu min a hai ngamloute kingainiam ngamlou ding uhi. Mi kingainiam i chihte mi dawilokte hilou in *mi hangsante* ahi zaw uhi. Kingainiam te tuh itna nei mite ahi nawn lai uhi. Inkuan sung leh namsung ah *itna kialpi* gu i thuk lallel uhi. Pathian in siangthou ding in thupiak a hon pia hi (1Pet 1:16; Eks 32:29). Siangthouna i gen Chiang in Swachh Bharat Abhiyan mission sang a thukzaw Pathian siangthouna gen i hi. Siangthou i gen pen economy leh sum-le-pai manphatna toh kikum hi zenzenlou ahi. Na inkuan Khrist toh pumkhat ahiehleh Jesu mel adawk hia? Pathian nei nam i hih leh midangte’n Jesu amu uh hia? Huaiziakin Khrist toh kipumkhatna i poimoh uhi. Inkuan sung ah, i kholai uah, i pulpitte uah hiai i thupi uh khalam muh theihlauh lam (i.e. abstract/mystical/passive union etc) uang gen zolou in a taka a siangthouna lam nak sem a gen in i hinpah ding uh aw. ■

KHRIST TOH KIPUMKHATNA

- Rev. Dr. M. Khamkhanchin

Thumapi: Tukumi Saptuam' Thupi dia telkhiak "Kipumkhatna" kichi, Ephesate 4:3 apan kilakhia ahi. Hiai i thupi khateng a dia khennen nawn, February thupi di'n ***Khrist toh kipumkhatna*** chih ahiah toh kiton in tua thupi zang in kikumkhawm leng i chi hi.

Ephesate kiang a laikhak hoihtak a i sut leh, a gelhtupa' tup chiangtaka muh theih om hi. Bung 1-3 sung ah Thugin/ Kibulphuhna (Doctrine/ Foundation) hon genchian masa a, bung 4-6 kal ah Khrist a kibulphuhna hoihtak neih zoh chia, i hinna mahmah a lahkhiak, hinkhiak pih ding ahiah dan hon genchiang mahmah nawn hi. Gingtute'n Khrist toh kibulphuhna detdoutak i neihna in Khrist mah toh hon kipumkhat sak vek a, tua kipumkhatna mah khovel mai a lahkhiak ding i mohpuak ahi hi. Francis Schaeffer in "*Khovel in Gingtute' kipumkhatna taktak amuhchet ma uh, Jesu Khrist leh Khristian hihna hon gintak ding uh lamet louh ding ahi*" ana chih dik mahmah ding in gintak huai hi.

Pathian lunggel poimoh penpen tuh, Ephesate 1:10 ah

"A deih lam a a thilgel ahiehleh, a hunbi a hong kim chiang, thil tengteng, van a omte leh leitunga omte, Khrist a gawmkhawma, a suktuah vek ding" chih ahi. Hiai hihtangtunna ding in Khrist mahmah sa hong suak in, sa leh si a tatna hon bawl ta. (Jn.1:14; 3:16). Khrist toh kipumkhatna i chih omdan Laisiangthou hon sinsak dan tomkim in enkhawm leng.

1. Khrist toh kipumkhatna: Kipumkhatna i chih, Dictionary ah "Lungsim leh Taksa a omkhawmna lam genna" hihmahleh, i Laisiangthou gen pen tua khenlam pek genna ana hi hi. Eph.5:23,32; Rom. 6:5-6 te ah Paul in hon genchiang mahmah hi. Khrist toh kipumkhatna tuh Khrist tuh Saptuamte' Lutang hi a, Saptuam leng Khrist Pumpi ahiah dan genkhiakna ahi hi. Gingtute tuh Khrist sisan vang

a tatsate chih a om, a sihna a sikhawm, amah toh vuikhawm a om, a thohnawn bang a thounawn ding, tua ahih man a, amah toh zopkhawm a omta leh, ahihna koppih i na hita uhi. Hiai ah Khrist toh kipumkhat i hihna hong kilang chiang mahmah hi.

2. *Khrist toh kipumkhat i hihna hinkkhua a lahkhiaak ding dan:* Khrist toh pumkhat i hita chi a lungkim sukmai ding ahi kei a, hiai kipumkhatna in a ngiat, ei apan suakkhia ngeingei ding a i Toupa'n a deih om hi. Tua bangdang hilou, Amah batna neih ding ahi.

a. Kingaihniamna: “*Khrist Jesu a leng om hiai lungsim tuh nei le uchin*” (Phil.2:5) Jesu lungsim/lungput tuh *Kingaihniam* ahi. Hiai thumal poimoh mahmah ahih dan i gen gen lai in, Romete leh Greekte'n ana neilou ua, *Kingaihniamna* tuh dawilokna, hatlouna leh vualphaklouna dan in ana ngaihsun uhi. Kingaihniamna i chih hatlouna hiam miphaklouna hiam hi zenzen lou, *i hatna leh thilhihtheihna thuguk* ana hi zaw hi.

- I Toupa'n Kingaihniamna lungput a neih man in Pa Pathian kipaksak a, Mikhialte Hondampa hong suak hi (Phil.2:7-8).
- Pathian in Mikingainiamte hehpihna pia hi (Jak.4:6).
- Pathian mai a siamtansaka omte, mikingainiamte hi uh (Lk.18: 13,14).

Kingaihniamna lehlam ah, a lauhuai mahmah i lak a siatna tun thei tuh Kisaktheihna ahi (Paun.16:18). Gingu hi ngal, mi sanga siam-zaw, pil-zaw, hih thei-zaw kisakna. Hat-zaw, kizen-zaw kisakna. Hau-zaw, dinmun hoih-zaw leh thuneizou-zaw kisakna leh a dangdang i neihkhakte KISAKTHEIHNA piangkhesak tute ahi ua, Pathian in tua bangte dou hi (Jak.4:6).

Kingaihniamna hilou, lah kingainiam dan a kikoih te'n i na zat zel uh tuh “Kei zaw mibang a pillou, thu le gentheilou, la lah satheilou/siamlou...etc” chi sek, kuahiam in mihainu/pa, miphalou nu... chi kha zenzen leh la ut dek lou zel. Hiai bangte kisaktheihna hi zaw kha ding hi.

- Khrist toh kipumkhat i hihna uh khovel a latsak

ahihna ding in *Khrist Jesu a leng om Lungsim kiniamkhiakna* nei in hinkhiakpih chiat ni maw.

b. Ngaihdamna hau: “*Pa, amaute ngaidam in; a thilhih uh athei kei ua ahi*” (Lk.23:34). Rome sepaihte’n suamhat Kross a a kilh Chiang un na sa lua uh ahih man un, kikou vongvong in a pianni uh (birthday) bang hamsiat zel uh kichi hi. I Toupa Jesu leng tuabang a hih ding in Rome sepaihte leh a kiim a ente’n gingta uhi. Himahleh, Jesu’n bel thuakvuallouh natna, haksatna leh kousiatnate dohzou taka thuak teitei in, a tawptawp in hong kikou khia a, mite lamet dan hi hetlou in, a sawitute ading mahmah in ngaihdam ngetsak thei mawk hi. I siatna ding ngaihtuah kia hilou, hon sawitu, hon kousiate, simmoh taka maitanga hon chilphihkhumte, mulkimhuai tak a hon that dia khutlikte toh kimaituah a om laitak a, amaute itna ziak a ngaihdam ngetsak thei i om diam aw...!! I Toupa Jesun ngaihdamna hau hinatel e..!

Peter in mikhial bangzahvei ngaihdam ding chi-a adot lai

a, i Toupa Jesu’ dawnna in lungsim hon khoih mahmah hi. Hiai ah Khrist lungput Chiang mahmah hi (Mtt.18:22). Sagihvei mun sawmsagih tan achi in 490vei chihna hilou in, a khelh teng un ngaidam toutou in achihna hi zaw hi. Midang khelhna khatveina ngaidam, nihveina ngaidam, thumveina chu...ha gawi zen a “hiai tuh a th..u..mveina hita..., ngaidam theilounawnlou mawngmawng di..” chi phangphang maimah i hikha diam, kivel ni.

- Mite khelhna ngaihdam haksa i sakleh, Pathian in leng i khelhna hon ngaidamlou ding hi. (Mtt. 6:14,15)

c. Mangthangte itna: (Lk.23:43) “*Chih taktak in kon hilh ahi, tuni in ka kiang ah Paradis ah na om sam ding*” i Toupa lungsim laingek a om, leitunga hongpaina ziak, kross a hong sihna ziak tuh mangthangte itna ziak ahi (Lk. 19:10). Mihingte i sih ding kuan ua kithuvaikhah, poimoh ngaihlou ki omlou ding hi. Tuabang mah in i Toupa’n leng a thu nanung, nungzuite kiang a avaikhah poimoh mahmah ahih dan pawk thak leng i

chi hi. Mitengteng a kiang a Paradis a aom ding uh lungtup leh deihpen a nei in, “...*Khovel tengteng ah pai unla, thilsiam tengteng kiang ah Tanchin hoih hilh un,*” (Mk.16:15) chi nguatnguat mai hi. Khrist toh kipumkhatna, amah batna i neihna tuh, a lunglutna pen lunglutpih ahi. Tua hi Pathian Saptuamte Nna Gol Pen, semsuaah ding a thupiak i hi. Christopher Wright, Anglican Missiologist (OT Scholar) minthang mahmah in hiai bang in a na gen hi- “*God does not have a Mission for His Church; He has a Church for His Mission*” Or (Mission was not made for the Church; the Church was made for Mission). Pathian in A Saptuamte sep ding in missionari nna a nei/a pia ahi keia; Missionari Nna sep ding a om man in Saptuam a nei /a puh a hi zaw hi. Tua ahih man in, Saptuam hihna diktak tuh, “Missionari saptuam” a hi. Missionari Nna sep ding a om ziaak in Saptuam a om hi.

- Khrist toh kipumkhat i hihna lahkhiakna in, Mangthangte itna lungput i nei chiat na hiam kivel thak ni.

3. Khrist toh kipumkhatna in Hamphatna tampi tun hi: Sa leh si a hon lei, i Toupa Jesu Khrist toh kipumkhatna (Khrist batna) in, kingaihniamna, ngaihdamna hauhna leh midangte awlmoh a mangthangte veina hon neihsak ban ah, Toupa kipaksak a, hamphatna tampi piangsak hi:

a. Mimal hamphatna.

Mihing hinkhua in Toupa a kipahsak chiang in, a melma nangawn amah toh kilem in a bawl hi (Paun.16:7).

b. Pawlpi hamphatna.

Ngai un, unaute kituak diamdiam a omkhawm a nak hoih in a nuam mahmah hi...Huai ah Toupa'n vualzawlna thu apia a, tangtawn a hinna ding ngei (Sam 133:1,3b).

c. Taksap lunggulhte mu a hamphatna.

Na lak ua mi nih, a thilnget thu ua a kithutuah uleh; ka Pa van a om hihsak in a om ding uh (Matt.18:19).

d. Khrist nungzuite chi a theih a om hamphatna.

Nou na ki-ittuah chiat uleh ka nungzuite na hi uh chih mi tengteng in huai ah a hon thei ding uh (Jn.14:35).

Thukhitna: Khrist toh kipumkhatna i neih theihna ding a, hihtheih i neihlouban ah Khrist toh kipumkhat poimoh i hih lamlam leng phawklou a i om laia, tatekna ziaka sisa, eite nangawn Khrist toh hihhing khawm aomte i hi uhi. (Eph.2:5) Khrist toh pumkhat i hita chi a lungkim sukmai ding ahi kei a, haii kipumkhatna in a ngiat, ei a pan suakkhia ngeingei ding a i Toupa'n a deih leh hon lamet ana om tuh, Amah batna nei a,

hinkhua mahmah a lahkhiak ding ahi.

Unau, tu kumthak bul i pat toh kiton in, Khrist Jesu toh kipumkhatna (Khrist batna) in, kingaihniamna bang, ngaihdamna hauhna bang leh Khrist lou a mangthang mai diingte veina thak hon neisak henla, tuate HINKHUA A LANGKHESAK chiat thei ding in Kha Siangthou in hon ompih in hon makaih chiat hen aw... Amen. ■

PATHIAN TOH KIPUMKHATNA

Tangtel: I Korinthte 6:17

- Rev. Dr. Sonna Langzakham

I. Pathian Toh Kipumkhatna Hilhchetna

A. Thumal Hilhchetna:

1. *Kipumkhatna* kichi thumal Hebrai-pau ah *Yahadh* ahi a, **Kigawmna** chihna ahi. Grik-pau ah *Henotes* ahi a **khat hihna, kituahna** chihna ahi. Kipumkhatna tuh kigawmna, khat hihna leh kithuahna ahi.

B. Pathian Toh Kipumkhatna: Pathian toh Kipumkhatna tuh Pathian toh kigawmna, Amah

toh khat hihna leh Amah toh kituahna ahi. Pathian toh ka kipumkhat ka chih Chiang in, Pathian toh ka kigawm ua, Amah toh khat ka hi ua, Amah toh ka kituak uh, ka chihna ahi.

II. Pathian Toh Kipumkhatna Hilou

Pathian toh Kipumkhatna tuh pathian neu hihna ahi kei. Amerika a tele-evangelist Benny Hinn in, *Ei gingtute Pathian' tate i hih ziak un, pathian neutte i hi uh*, a chi hi.

Benny Hinn' thugen thudik ahi kei a, Pathian gensiatna ahihziak in khelhna ahi. Gingtute khamit theihtawp in khami lengle, pathian neute i hi ngeikei ding uh. Mihing i hi ua, mihing in i omden ding uh. Van gam i tun chiang in leng pathian neute i hikei ding ua, Pathian batna neite i hi lai ding uhi. I Pathian tuh khat kia omsun Pathian ahi a, Pathian khat kia hi in a om tawntung ding hi.

III. Pathian Toh Kipumkhatna Omdan

I Laisiangthou tangtel in, *Toupa zop bel amah toh kha pumkhat ahi uhi*, a chi hi. Sappau Bible (NASV) ah, *But the one who joins himself to the Lord is one spirit with Him*, a chi hi. Hichi in let leng a theihshiamhuai zaw deuh diam ka chi hi. *Himahleh, Toupa toh kizom mi tuh amah toh kha khat ahi*, chih in. Hiai i tangtel: *Himahleh* chih thumal in akipan hi. Hiai in tang 16 a kigen thu toh tang 17 a kigen ding thu kibang lou ahi chih ahon hilh hi. Tang 16 ah Paul in kijuaknu toh kizom mi tuh amah toh sapum khat ahi uh, a chi hi. Hiai tuh sapum a kizopna leh sapum a kipumkhatna ahi. *Himahleh*, Pathian toh

kizom mi tuh Pathian toh kha a kizom in khat in Pathian toh a kipumkhat uh a chi hi. Pathian toh kipumkhatna tuh kha a kipumkhatna ahi. Pathian toh kipumkhatna tuh kha a kipumkhatna ahih ziak in, Pathian toh lungput, thiltup leh nasep kibang neihna leng a chih theih hi.

IV. Pathian Toh Kipumkhatna Kilatkhiakna

Pathian toh kipumkhatna kilatkhiakna gen ding tamtak a om hi. Tuate lak a khat ahihleh **Kingaihniamna** ahi. Philippite 2:1-11 ah Sawltak Paul in Jesu Khrist' lungput bang lungput nei ding in Philippi saptuamte a hasuan hi. Jesu Khrist' lungput a gente lak a khat ahihleh *lungsim-niamlakna* ahi. Tang 3 ah Paul in, *Kikhenna ding leh kithupisakna ziak in bangmah hih kei un, lungsim-niamlak in, mi chih in ama sang in midang hoih sa zaw hen*, a chi hi. Hiai a *lungsimniamlakna* kichi tuh *kingaihniamna* leng a chih theih hi. Kingaihniamna tuh eimah-le-eimah i kikoihdan ahi a, huai tuh eimah sang a midangte hoih zaw sakna leng ahi. Kingaihniamna ahihleh eimah kingaihshiatna hilou in, i dinmun diktak i kikoihna

ahi zaw. Ei gingtute kuate i hi ua? Jesu Khrist ginna tawn a Pathian' hehpihna in ahon hotdam mikhialte i hi uhi (Ephesate 2:8). Hiai i dinmun diktak uh ahihziak in, gingtute'n eimah ah kisaktheihna ding bangmah i nei kei uhi.

Toupa Jesu Khrist ah *Kingaihniamna* kichiantak in i mu hi. Luka 22:27 ah nungzui 12te'n a lak ua thupipen hih ding kituh a a-kiselbuai lai un, Jesu'n amaute kiang ah, *Kei zaw na lak uah sikha bang in ka om zaw*, a chi hi. Hiai ah Jesu Khrist a kikoihdan i mu hi. A kikoihdan ahihleh *sikha* ahi. Jesu *sikha* kichih in a kingaihniamna a taklang hi. Johan 13:1-17 ah Jesu'n a kingaihniamna thilhih in a taklang hi. A thilhih ahihleh nungzuite khe a silsak ahi. Jesu' hunlai in, khe kisilsak tuh sikha niampente' nasep ahi. Israel gam a lampite pakka ahi kei ua, leivui in a dim hi. Lampi a paite khe leivui in a pumtuam hi. Inn kong ah tui a dim tuibel khat a kikoih hi. Huai inn a hong lenglate khe inn kong ah sikha niampen in tuibel a tui in a na silsiangsak zel hi. Jesu Khrist' kingaihniamna tuh

sikha niampente nna a sepna ah a kilang hi.

Jesu tuh Pathian ahi. Van mi teng in sun leh zan a phat a, pahtawi a, thupina a piak tawntung uh ahi. Bangkim siamtu, bangkim tung a thunei leh thilhihthei ahi. Amah kiliansak leh kisathei in, kingainiam keileh, mikhialte tan ding in hiai khovel ah ahong pai kei ding a, a nungzuite khe leng a silsak kei ding hi.

Bang in Jesu kingainiamsak a, khovel mihing a hong pai a, sikha bang a hong khosa a, a nungzuite khe silsak a, sikha niampen' nna hong semsak ahia chih na ngaihtuah ngei hia? **Pa Pathian toh a kipumkhat** ziak uh ahi. Pa Pathian in ei mikhialte tan ding a khovel a ahon sawl in, Pathian toh a kipumkhat ziak in, a kingainiam a, thumangtak in vanmun nusia in, khovel ah mihing a hongpai in sikha niampen' nna a hongsem hi.

Pathian toh kipumkhat gingu tuh a nung a zuihpa Jesu Khrist bang in a kingainiam ding ahi. Gingu kingainiam in ama sang in midangte hoih a sa zaw hi. Kingaihniamna kilehbulh ahihleh *Kisaktheihna* ahi.

Kisaktheihna tuh eimah lianpen leh thupipen a kikoihna leh midangte muhsitna ahi. Huan, mikisatheite'n amau sep tham louh leh sep tham in nnate a khentuam ua, sep ut leh sep ut louh a nei uhi. Huan, mi kisatheite ahihleh a tangpi in mi chihhakte ahi ua, amaute ziak in, thilsia tamtak a tung nak hi.

Inkuan, khotang pawl leh nam tamtakte ah kipumkhatna a om kei. Kipumkhatlouhna in kimelmakna leh kidouna piangsak in, siatna leh manthatna tamtak a tun hi. Nu-le-pa kal a kipumkhatlouhna, nu-le-pa leh tate kal a kumpumkhatlouhna, mou leh tekpi kal a kipumkhatlouhna, invengte toh kipumkhatlouhna, seppihte toh kipumkhatlouhna, khotang a heutute kal a kipumkhatlouhna leh nambing sung leh nam dangte toh kal ah kipumkhatlouhna a om hi. Manipur Naga chihlauh, singtangmi Khristian kichi eite lak ah leng kipumkhatna a om kei a, melma kibang leh khat nei khawm a, gal i dou lai nangawn in leng, i sung uleh i kal uah kipumkhatna a om taktak kei lai hi. *Kikhen Thei I Hi Pou E*, chih leh *I Gam Hilou Ham*

chih late'n i kipumkhatlouhna a phoulak hi. Nam bing a kitheihna minte Kuki, Paite, Zou, Vaiphei, Gangte, Hmar, Mizo chite min a a-tuam a nna sem a, a min mah latsak teitei deihna a om hi. Khenkhat in Kuki ahihkeileh Kuki-Zou pua a om vek ding deih pawl leh deih lou pawl a om hi. Huan, galte apan kivenbitna leh douna toh kisai in leng hiai mun kou area, huai mun nou area chi a kihuituamna a om lai hi.

Khristian kichi vek eite lak a kipumkhatlouhna bangziak a om ahia chih na ngaihtuah ngei hia? Kipumkhatlouhna a om ziak bulpipen ahihleh i kingaihnam louh ziak uh ahi. Huan, bang ziak a kingainiam lou i hi ua i chihleh **Pathian toh i kipumkhatlouh** ziak uh ahi. Tapa Pathian tuh (Jesu Khrist) Pa Pathian toh a kipumkhat ziak un, mikhialte tan dia khovel a Pa Pathian in ahon sawl in a kingainiam a, thumangtak in ahong pai hi. Pathian toh kipumkhat mite a kingainiam ua, mihingte'n nna niampen a koihte uh tan in a sem uhi. Pathian toh kipumkhatna i neih louh ziak un, kingaihnamna i nei kei ua, kingaihnamna i neih louh

ziak un, eimah ngaihdan leh deihdan kia dik sa in, midangte ngaihdan leh deihdante i pompoh thei kei uh. *Ken ka thei khial*, ahikheileh *Ken ka hih khial chi* ding i om kei ua, dik kisa vek leh panna i let tentun ziaak un, kituahna leh kipumkhatna a om thei kei hi. Mi chih kingainiam in *kei ka khial*, *hon ngaidam* in kichituah chiat in mi tamzaw deihdan pomthei chiat leng kikhenna kintak a bei ding a, inkuan leh

nam sung ah kipumkhatna a ompah ding hi.

Huan, hiai thei ni! Pathian toh kipumkhatna neihna dia kalbi masapen ahihleh i khelhnate kisik a, Jesu Khrist eimah mimal hondampa a pom ahi. Hotdamlouh mikhial in Pathian toh kipumkhatna a nei kei hi. Pathian toh kipumkhat lou in kingaihniamna a om thei kei a, kingaihniamna lou in inkuan leh nam sung leh namte kikal ah kipumkhatna a om thei kei hi. ■

PATHIAN THEIHNA (LAISIANGTHOU TUNGTAWN) IN HINKHUA KHENG HI

- Sawltak Lienhmingthang

THUPATNA: “Laisiangthou bangzahvei na simsuakta/busuahta a?” chih dotna poimoh tak ahi. Huai mah bang in, a poimoh zaw tuh, Laisiangthou a na sim Thu te’n “Kei ah Pathianmitna leh Khrist batna neihna di’n lungtang tengteng, kha tengteng, hatna tengteng, leh lungsim tengteng in kipumkhekna hon tun hia? (Luke 10:27; Rom. 12:2.” chih ahi. Pathian Thu tungtawn in bang lam ah khangpih thei zel hi in na kithei a? A thu theihna vantang (information) a theihna tan chiang in hun tamzaw a bei in na thei hia? Khristian khat hihna ziaka sim ngeilouh tel hial zaw kisanlahna nei a Laisiangthou sim i hi hiam? Tuata tuh sahkhawmitna ahi. Pathian theihchetna ah muanngamna hon behlap dia, muanngamna in thumanna hon behlap ding hi. Tuata tuh Pathian theihna (Laisiangthou tungtawn) in hinkhua kheng taktak ahihna chetna hong hi ding hi.

THEIHNA: Theihna kichi tuh chetna leh zuihna toh a hong ton khawmlouh chiang in bukimplou in lauhuai a, ei adia siatna tuntu hikha thei hi. Theihna leh muhdan a hong leng (sawi) chiang in bawldik haksa mahmah hi. Mihing khangthu ah numei theologian masapen pen tuh Evi ahi. Pathian Thu (thupiak) za kha hetlou leh theikha hetlou a zuilou ahiehleh bel theihshiamhuai ding hi. Himahleh, za leh thei mahmah hinazen pi (Gen. 3:3, 6) in zuilou hi. Pathian Thu pen muanglah ding a khem in hong om a, Satan in Pathian Thu pen Evi lungsim in a theihdan pansan a nialkahn lungsim pusak in, Evi in a deihtelna zang in amah kikhutdot (dot ding Pathian leh a pasal Adam nei zen pi donglou in) Pathian thu a theih pen A Siamtu Pathian apan ahidhan thupi ngaihluou in, amah theihshiamna dan pen thutawp suah a a thupisak zawk ziak in Pathian tung ah hong khial hi.

Achiil apat a tuni dong a Khristiante nawmvalh ding a Satan panlakdan tuh Pathian Thu ginlelh/muangmoh sak leh heikawi (diluted information

and crooked knowledge) ahi. Thudik kim chiang zang a Jesu khial ding a khem in om mah leh Jesu'n Pathian thutak thudiktak zang in Satan khemna nang zou hi (Matt. 4:1-12; cf. Eph. 6:14; 2 Tim. 2:15). J.I. Paker in a laibu gelh *Knowing God* ah "Pathian tungtang theihkhakna nei toh Pathian theihna taktak neih kibanglou hi" (There is a big difference between having a knowing about God and knowing God) chi a a gelh mah bang in bangchi bang theihna pen nang leh ken i nei a chih kidot tuak mahmah i sa hi.

Pathian in a Thu hon piak eite'n Pathian ahiehna leh a tangtawn thilgel theihshiamna ding a hon piak hi ahi, huai tuh eite hoihna ding leh damna ding ahi (Jer. 29:11). Himahleh, Pathian hon deihsak tuk in Amah theih utna leh lunggulhna neihluou a i taksap chiang in theihshiamlouhna leh lungkimlouhna hon tun hi. Hosea 4:6 na ah Toupa'n hichi in a chi, "Toupa'n a mite theihna taksap ziak in hihsiat in om ua; theihna na deih louh ziak in... na Pathian dan na mangngilh ta chih thei in, ken leng na suante ka mangngilh ding hi." Mimal,

innsung leh khotang ah siatna leh buaina i tuahte enthak in velthak leng Pathian theihna taksap ziak, a dan deihlough leh ngeingaihough (mangngilh) ziak ahi ding hi (tu tung sa leh gal buaina leng hiaiziak hikha mawhlou ding hiam!). Sa leh kha a Pathian theihna siangtak leh diktak neih theihna ding in Sawltak Paul in Timothy kia'h a gen "Laisiangthou ah om gige ...thei gige in ... Laisiangthou peuhmah Pathian hatkhum a piak ahi a; huaiziak in thuhilhna ding, taihilhna ding, bawlhohina ding, diktatna lam a kichilna ding in a phatuam hi. Huchi a Pathian mi na hoih chiteng semding a kimtak a kivan a a kim theihna ding in (2 Tim. 3:14-17)" huai mah tuh eite hih ding him ahi.

Toupa a chian zaw sem a theihna in Amah ah muanna ngak ngamna hangsanna leh thalawpna hon tun hi. *Sam 9:10 – "Huchi in Na min theite'n a honmuang ding ua; Nang zaw TOUPA, Nangmah honzongte na paisan ngei ngal kei hi."*

MUANNGAMNA:

Paite Dictionary Dr. H. Kamkhenthang in "Trust" i chih "Hoih dia muan zohna"

chi in let hi. Thumal khat a gen in muanngamna kichi tuh ei a hoih hon tun thei dingte tungah muanna kinga ngam pan phet hi. I phattuum pih lough ding mi leh thil tung ah tuh i ngaihtuahna, tha-le-zung, sum-leh-pai, i tunung ding, leh i bubitna ding (security) a muanna kinga ngamlou ding hi.

Niteng-hunteng in meltheih ngeilough leh theih ngeilough tunga muanna kinga mun mahmah hi – auto driver, taxi driver, sumo driver, helicopter driver. I tunna ding munte bit leh dam in hong tunpih zel uhi. Himahleh, hoihlak leh chiantak a theih luatlough tuh kipum muanngam taktak theilou hi. Kuahiam khat i kithuahpih tam semsem chiang in ahihna leh mizia i hon theihkhiak tam semsem chianga muanhuailou sakna lian semsem thei chih bang omthei hi. Himahleh, a lamdang mahmah tuh Pathian toh kithuah tam semsem a, Amah theihna a i hong khan semsem chiang in tehvuallouh leh nial vuallouh a A muanhuai dan kisinkhia semsem hi. Huai in lungmuanna bukim, lametna hoih leh thil etdan chidam huaitak hon pia belap lai ding hi.

Himahleh, Jakob in ei gingtute “ginglel pahpah, lungsim det neiloumi, lungsim thua neite (Jak. 1:7-8; 4:8)” chi a gen in eite hihna hon genkha mahmah hi. Zekharia (Baptispa Johan pa) tuh kum tamtak teknungvuainung tanpha in ta deih in Pathian kia’h thum den hi. Toupa’n a thumna dawng in Gabriel tungtawn in a tapa min dingtanphalenghilh in om mah leh, muanglah hi. Muanlahna kichi a lauhuaina mahmah tuh Pathian thilhihtheihna muan zohlouhna ahi. Muanzohlouhna gah Zekharia in huai hun mahmah a a loh tuh pautheilou leh bengngong ahi (Luka 1:20, 62-63). Pharisaite, sadukaite leh laigelhmiten Messiah hong pianna mun ding sim in thei mahle uh “Laisiangthou (in agen Jesu ahilham theihna kichian neilou ua) leh Pathian thilhihtheihna a theih louh ziak un ngaikhial nak uhi (Matt. 22:29). Huailou in Johan 5:39-40 ah Jesu’n “Laisiangthou sung a tangtawn hinna om ding a na ngaihtuah ziak un na nak zon ngial ua; huaite mah ka tanchin theihpihtute ahi uhi. Himahleh, hinna nei ding in ka kiang ah na hong nuam kei uhi”

chi hi. Hiai tegel apan a sintuak mahmah tuh Laisiangthou thu theih dan pen ei ngaihdan, theihdan leh lametdan pen dik hihsakkhak nilouh lauhuai a, a thugil pen Jesu tungtang gen ahildan theihna dik in hinna thak hon tun taktak a, Pathian thu gente muanhuai hi (Jesu ah hong tangtung ahilman in).

T. Pumkothang laa phuah “*Kon ompih ding banzal ka hon len ding, lunglau lou aw Nang din Toupa ka hi; Nangmah hatna hilou kei hatna in, Hon nusia kei ning Nang toh omkhawm ding*” chih in Toupa muanhuaina theihna ding in Amah i theih chet poimoh masa hi. “Hon ompih ding chi a lah haksatna hun ah koi a hon om mang san ahia? Ka poimoh hun tak chiang in hon panpih geih geih kei! Bangkimthei leh Bangkim hihthei ahil aleh bang achia haksatna, lohsapna, tagahna, simmohna, gentheihna, thawmhauna hon palsak sese ahia, huaite pumpelth thei dia bangkimthei leh bangkim hihthei a hihna koimun leh bang hun a zat dia a koih ahia?” chih dotna awm thei mahmah leh dik thei sim mahmah dot hun omsek nak hi.

Jesu tuh ahi a “khowel tawppha in ka hon ompih ding (Matt. 28:20)” chi pa tuh khowel tawpma a i kiang nai a om gige Immanuel Pathian (Matt. 1:23) ahihna hon lahkhiakna ah a Pathian tuh a Thu ah muanhuai leh khamuanhuai ahi chih hon sinsak hi. Huan, Laisiangthou in Jesu – “Jan leh tuni leh tangtawn a Jesu a ngei ngei (Heb.13:8)” chi hi. Huan “Pathian zaw zuauhat mihing ahi kei. Kisik hat mihing tapa leng ahi sam kei. Agensa ahih kei dia hia? A na gensa ahih piching kei dia hia? (Num. 23:19) leh “Kei Toupa ka zulhzau kei a (Mal. 3:6).” Jesu hong ompihna khamuanhuai ahih lailai in Amah ompihna thei a ginomna leh chihtakna suah a i hihna leh sepna peuh uah muanhuai ding ahi (Matt.24-25; Pau. 15:3; Sam 33:18; 121). Huaiziak in, i omdan ding Toupa tung ah ngak ngam tuh Toupa deihlam leh kipahpih lam ahi chih phawk ni (Sam 37:5, 7).

Job 1:22-24 – Job in a tuah ngeilouh lungzinna, mangbatna, lohsapna, channa, nekasiatna leh lungkhamna huaisetak ni khat thu/hu a a tuah laitak in,

Satan lamet dan in Pathian a gensia suk muat muat kei a, a vui kei a, a phun kei a, Pathian a chou kei a – Lungkhamna tuh Lungkimna a suah a, Buaina khukupi tuh Biakna a suah hi (Job turns his Worries into Worship). Thukhun Lui hihchian sinsaktu khat in hichi in achi, Job phunna leh hehna te en vengveng leuchin, Pathian kiang a Thumna ahi. Huaiziak in moh a tansak kei ahi chi hi.

Spafford Horatio in “A hoih hi, a hoih hi, ka kha di’n” chih laa hong gelhkhiak theihna ding in Pathian in lohsapna, gentheihna leh haksatna tuah phal ahihdan a theihnam leh Pathian khotuah dan a muhchet ngai hi. Unau deihtakte aw, na innsung dinmun meikuang paisuak dek mahmah dinmun in na ding hia? Na haksatna tutna ding theilou leh neilou in thawmhau tak in na om hia? Na khelhna ngaidam zoulou ding khop a nang leng kingaidam theilou leh Pathian in hon ngaidam zoulou ding khop a lungkia dimdem leh thanem ngeingui in na om hia? Toupa’n a itna leh hehpihna aw nem in hon sam gige lai

hi – “Hong pai in, ngaihtuah khawm dih ve ni... (Isai 1:18)” leh “Nou semgim leh puakgik pua te aw, hong pai un, keiman khawltawldamna ka hon pia ding (Matt.11:28-30) chi’n kingainiam tak in hon sam lai ahi. Dam na ut hiam? Panpihna ban na nawlkhin lai diam? Zuan meng ni.

Muanngamna in i muanpa thu mang ding dan i hinkhua ah hon behlap sak hi.

THU MANG: Thumanna tuh Pathian muanzohna ah hong kinga mahmah ding hi. Ei a dia buaihuailou, haksalou, nawngkailou, gimhuai lolou ding tan leh ei hoihna ding, metna ding, lamet ding, vualzawlna tanna ding tan a thumanna i chih tuh angmasialna, mahni thudeihna leh mahni thu tungnunsak zawkna ahi a, huai tengteng tuh Pathian thu manlouhna leh a thuneihna nialkalhna ahi (Juda 4).

Jesu nungzuihna ah ei ngaihdan, hoihsakdan leh duhthusam chih in mun neilou hi. Ei a zuitu i hi a, i makai leh zuihpa tuh Jesu Khrist ahi. Thu mang ding a kingainiam leh thanuam tak a kiluikhiakna tuh nungzuihna ahi – nungzuihna in hon ngiat tuh thumanna ahi (Matt. 8:18-21; cf. Sam 1). Jesu thu mang i kichih taktak leh a chetna hoih pen tuh Amah i itna leh A Thu kem in i zui hiam chih ahi (Jn. 14:23).

THUKHITNA: E. E. Hewitt in “Theih...Sin ka ut tamsem Jesu Thu (BL 136)” chi a Jesu Thu theih theih leh sin ut tamsem mah bang in hiai thugelh simkha teng in Pathian theihna in Amah i muanngamna hon behlap dia, Amah i muanngamna in thumanna hinkhua kikheng hong tun ding hi. Toupa’n hon lamet bang a khangthei ding in hon vualzawl chiat hen. ■

BAWLDIKNA:

KTZ January 2024 issue a phamta Upa L Vungzapau tanchin ah a pa min Pa Vungthuam Langel leh Nu min Nu Khawlching Khuphil chih di pen Pu Hausum (Suakdai) leh Pi Ngaigoih Hilsia kichi kha a poi mahmah hiai ah bawl dikna kon koihthak ua, simtute’n na hon ngaihsiam uh ka hon ngen uhi.

BIBLE STUDY



Pastor Tualthianmung Hangzo, Local Pastor, EBCC Jordan

Text : Kolosate

Thupi : Kolosate Laikhak akipan sinlai

Thumapi: Kha masa, January, in Kolosate Laikhak bulsuutna a bung pumpi in i na zousiang ta uhi. Tu February kha in Laikhak a kipan sinlai omte bangzah hiam kikum khawm le hang ka ut hi. Huan ah, i Laikhak bulsuutna toh kisai a ka thugelh tawpna hiding ahihman in simtute na vek ua tung ah kipathu ka hon gen a, Toupa'n noute hon vualzawl leh chih ka thuumna ahi.

Laikhak a kipan sinlai: Kolosate Laikhak ah “bangkim (*all*)” chih thumal 28 vei kimu hi. Huan, Paul in “Khrist bangkim hi zaw in, bangkim ah a-om behlap lai hi” chi'n gen hi (3:11). Jesu Khrist tuh thilsiam tengteng a di'a “*bangkim a bangkim*” ahihdan Kolosate Laikhak in a hon sinsak nop ahi. Huai “*bangkim*” a kipan sinlai omte i en ding:

Jesu Khrist tuh thilsiam tengteng a piang masapen (firstborn) ahi (1:15). Piang masapen (*firstborn*) in “*tungnunna leh thupina*” gen hi. Kumpi David ngei leng Pathian in tapa masapen *ahihke'h* piang masapen

di'a bawl ding ahihdan gen hi (*Sam 89:27*). David tuh sa ah a' sanggamte lak ah a naupangpen himahleh Pathian in a tungnungpen ding in bawl hi. Huai toh kibang in “*thilsiam tengteng a piangmasa*” chih in a gennop tuh Pathian in Khrist pen bangkim tung a tungnungpen di'a a bawl chihna ahi.

Saptuam, khotaang, innkuan leh i mimal hinkhua uah Jesu Khrist in tungnungpen hihna tang kha a himah diam?

Taj Mahal tuh Shah Jahan in a' zi theihgigena di'a a bawl ahi. A zi' duhthusam dan tak hileh a' zi hankuang pen Taj Mahal laigil tak ah miteng muh theih ding in kikoih ding

hi. Himahleh, inn a hon lam tak un, a inn lamna uah hong kilimsuah law kha ua, a' zi hankuang pen kong pawlam ah paimang kha uhi. Tuni Chiang tan in a building pen etlawm mahmah in, miteng pahtaak himahleh, lamkhiat a a-om nasan tak hikha nawn lou hi (NETBible: Sermon Illustration).

Jesu Khrist' min in saptuam tampi a hong dingkhia a, khristian innkuan chi'n innkuan i dinsuah ua, etlawm lua kasa hi. Pathian' tate chi'n minloh in i om ua, kipahhuai lua hi. Himahleh, Khrist in ei a mun laigil pen a luahkhak louh a, a kil khat a nelhsiah tak a omsak i hih khak ding uh lauhuai kasa hi. I saptuam, khotaang leh innkuante ah Khrist sam luut in tungtungpen hihna tangsak le hang ka ut hi. Huai tuh Kolosate Laikhak a hon sinsak nop ahi.

Jesu Khrist tuh bangteng om ma a om (preeminent) ahi (1:15). Khrist tuh thil bangkim siamtu ahildan leh amah adi'a thil bangkim siam a-om ahildan Laikhak in hon sinsak hi. Paul in "*bang teng*

amah ah a dingkhawm chiat uhi" chi hi (**1:17b**).

Tuipi sung a ngasa tampi a teen khawm bang un, Khrist sung ah miteng leh thilteng kikhai khawm hi. Tui a kipan ngasate lakkhiat a a-om Chiang ua a sih maimah bang un, Khrist toh thilsiamte a kizoplouh Chiang un, sihna leh siatgawpna om zel hi. Gam leitang, kivaihawmna, thuneihna, lalna leh lamzannate Khrist ah khai khawm a om ahihman in, i lunggulh bangkim Khrist ah bukim lua chihna ahi. *Huai Khrist tuh amasa in i koih kha hia?* Khovel thilte sang a lunggulh zawk leh zon masakpen in i nei kha hia? Huan ah, Khrist a kipan hon kaimang thei thilte bang i loh a? Ei gingtute'n Khrist toh kizopna mah i let tinten ua, Khrist' mel liahmang thei thilte peuhmah i paihmang ding uh poimoh ahildan Laikhak tungtawn in i theitheu uhi.

Jesu Khrist tuh hondampa (redeemer) ahi (2:13-15). Khrist in a' kros sisan tungtawn a Pathian toh thilsiamte hon kilemsak a,

thilsiamte hon tungding thak nawn ahihdan ilaikhakin hon hilh hi. Hiai kilemnawna toh kisai ah Khrist in “siangthou, gensiatbei leh mohsak theih louh” di’a hon hondam ahihdan Paul in Laikhak ah gen hi.

Khawl (*machine*), inn (*building*) leh van khatpeuh a kisiat chiang in engineer-te *ahihke’h* scientist-te’n mihing pilna zang in bawloih thei zel uhi. Huan, mihingte’ taksa a zawngkhal chiang in doctor siamte’n bangtan hiam ah a hon bawloih thei uhi. Himahleh, mihingte’ kha (*soul*) leh hinkhua kisia pen Jesu Khrist lou kuamah a bawloih thei omlou ahihman in, a hon siamtupa pen mah eite hondam ding a mihing a hong piang ahihdan i Laikhak in hon sinsak hi.

Laa in, “*I gitlouhte na lou in A hihdam thei*” a chih chitchiat pen a phuaktu in muchian ka sa mahmah hi. I Laikhak ah Paul ngei in leng “*gensiatbei*” a Khrist in hon siamthak ahihdan gen hi. Huai tuh thil hoihlou i hih khakte ziak a maizumna leh zahlakna tuak lou ding in leh a pawn

(*scar*) nangawn om hetlou di’a Khrist in hon tuamdah chihna ahi. Hondampa hoih Jesu Khrist tungtawn a hotdamna bukim neite i hihdan Laikhak in a hon sinsak nop ahi.

Jesu Khrist tuh saptuamte’ lutang (head) ahi (1:18). Khrist leh saptuam (*ama’ pumpi*)

kizopna toh kisai a **lutang (head)** a kigen chiang in, Khrist in saptuamte a di’a a thuakna toh kigen khawm zel hi. Huaiziak in, hiai “*lutang*” chih thumal ah “*thunehna leh tungnunna*” kilang pahpah mahleh, a laigil ah *itna, lainatna, bitna leh hondamtu* hihna kiphuum om hi’n ka mu hi.

Inndongta vai ah sabaak hawmna neih ahichiang in, **Pu** a ding in sa-ngawng kipia hi. Huai tuh **Pu** in a’ lutang alang-alang a hei a, a’ tute poimoh leh taaksapte a et kimveel theihna di’a sa-ngawng kipia ahi hi. Pu in a’ tute a awlmohna leh a’ itna etsakna chih theih ding hi.

Khrist tuh i tanpa leh hondampa kia hilou in,

i taaksap leh poimohte khempeuh hon suktuhsak ding a hong kipia ahihman in Toupa' min i phat ahi. Lam lauhuai a hon keem a, itna leh lainatna toh hon enkoltu ding a Khrist, lutang a neite i hihdan uh Kolosate Laikhak in a hon sinsak nop ahi.

Thukhitna:

Thukhunthak Laibute lak ah Kolosate Laikhak sang a Jesu Khrist hihna tawisang zaw omlou ding hi. Laikhak in Jesu Khrist tuh "BANGKIM" chi'n pulaak hi. *Piang masapen, bangteng om ma a om, hondampa hoih leh saptuamte' lutang ahihman in bangkim tung a tungnungpen hihna tuh Amah ading him ahi hi.*

"Toupa aw, ka hinkhua pumpi ah nang tungnungpen hihna hong tang in. Ka omdante, ka lunggulhte, ka ngaihtuahnate, ka sep-le-bawlte, dik-le-diklou ka tehna ah, leh ka thil etdante ah nang thuneihna sangpen hong nei in" chi theihchiat ding in Toupa'n simtute hon vualzawl hen. Hiai tuh Kolosate Laikhak tungtawn a Toupa' sapna aw ahi hi.

Toupa'n thupina teng tang hen aw!

Laibu ette:

Dunn, James D.G. *The New International Greek Testament Commentary: The Epistle to the Colossians and to Philemon.* Grand Rapids, MI: The Paternoster Press, 1996.

Geisler, Norman L. "Colossians." *The Bible Knowledge Commentary: New Testament.* Eds. John F. Walvoord, Roy B. Zuck. Colorado Springs, CO: Cook communications Ministries, 2004.

Hendriksen, William. *Baker New Testament Commentary: Expositions of Colossians and Philemon.* Grand Rapids, MI: Baker Books, 1964.

MacArthur, John. *The MacArthur New Testament Commentary: Colossians.* Chicago: Moody Press, 1992.

O' Brien, Peter T. *Word Biblical Commentary Volume 44: Colossians, Philemon.* Waco, TX: Word Books, 1982.





Gammial Aw

Gammial Aw simtute tengteng i Toupa leh Hondampa Jesu Khrist min in Chibai Aw! Pathian ompihna toh kumthak melmu in, khakhat bang i zatkhith nawn nung in Field ah semtute'n leng tha ittak a alouma chiat uh sunzom a sem nawn panta ahihman un kipahhuai i sa hi. Pathian khasiangthou thopna leh ompihna tang a, tukum khat sung field tungtawn a Toupa gamna i sepna ah khamangthang tamsem piak a i om kum hong hihna ding in thum ni. A gamna sem a Field a kalsuankhia semtute leh innlam a thilpiak leh thumna a na pangte tungtawn a Toupa'n gah hon piak nawn hiai anuai ate enkhawm nawn ni.

A. HIMALAYAN MISSIONS FIELD

KIPATHU GENNA LEH THUMNA DINGTE:

1. Toupa'n A misiangthoute thumna leh semtute sepna tungtawn in gah kipahhuai tak gingthak thum (*Kirtipur -1, Khudunabari-1 leh Sangratar-1*) hon piak nawnte ziak in kipaithu gen ni. Amaute'n Khrist nung a zuihna ding ua gin-om leh chihtak suah a kal hon suantheihna ding un thumpih ni.
2. Khristmas Project toh kisai a semtute'n amau mun chiat a om ginglomite samkhawm in kithuahpihna a neihpih hun ua thilpiak leh ankuang chikmah a sawkpih ngeilouhte toh sawkkhawm in hun a na zatpih thei uhi. Hiai bang ginglou mite lak a semtute'n a kalsuannate uh tunung a hong gahsuahna ding in thumna toh delhzui poimoh i sa hi.
3. Semtute leh a inkuanpihte un a omna mun chiat ua a mohpuaknate uh Toupa apan ahihdan phawk a tha-ittak leh kuhkaltak a tuni dong hon sepzel theihman un kipaithu gen ni. Toupa ompihna toh gahsuah leh lohching a kal hon suan ua, tukum 2024 a khamangthang tamsem mat kum hong hihtheihna ding in thum ni.
4. Khristmas hun a semtute'n tangthupha a gente uh a biktak in ginglou mite lungsim ah khasiangthou in na hon sep a,

gah manpha hon suantheihna ding in thumzom lai ni. Ban ah, Khristmas project tungtawn a semtute'n houlimpih leh kithuahpihte uh lungsim a Pathian in thu a gen a, Khrist theih beh utna leh san utna a neih theihna ding ua Pathian apan houpihna a zak theihna ding un thumna toh delhzui ni.

5. Semtute leh inkuante'n kha, lungsim leh salam chidam zawsem leh, thanuam leh kuhkal zawsem a Toupa gamna tha ittak leh veitak a hon sep ahitheihna ding un thumpih ni.

B. DHEMAJI MISSIONS FIELD

KIPAHTHU GENNA LEH THUMNA DINGTE:

1. Pathian ompihna toh semtute'n tukum thak a bangmah buaina omlou a a louma chiat uh sunzom thei ahihman un kipahtu gen ni. Toupa pina toh chidam a tukum khat sung a sepna chiat uh a sepzom theih ua, khamangthang tamsem a matna ding un thumpih ni.
2. Khristmas Project a semtute'n amau Station chiat ah Study Centre naupangte lak leh gingtute lak a programme & activities tuamtuam a saite uh lohchingtak a zouthei ahihman un kipahtu gen ni. Nasep khiak a neihte uh leh tangthupha a gente un gah kipahhuai hon piakna ding in thum ni.
3. Mr Paulap Doley kichi semtute'n Pathian thu ah houlimpihna neihpih uhi. Pathian kha nasepna toh gingu hong hih a, Jesu lal leh hondampa ding a hon san theihna ding in thumpih ni.
4. Gogamukh area ah semtute'n December 2023 sung in Mising Autonomous Council (MAC) Office Staff , Hospital, Police Station leh mun tuamtuam a NT Bible Assamese a kigelh bu 64 leh Gospel Tract ginglou mite kiang ah ana hawmkheta uhi. Hiai nasepna in a simkha mite lungsim a na a sep a, Pathian hing a muh theihna ding un thumna in phawk ni.
5. EBCC Amguri ah Pathian vualzawlna leh makaihna toh kumlui December 2023 in Pastor S Thangbiakmang khut tungtawn in saptuam dan a kiteng nupa kopnih: **1. Gameswar Taid & Hemi Taid** leh **2. Kulamani Kuli & Nirumai Kumi** te om uhi. Amaute'n Khristian inkuan diktak hon neihtheihna ding un A misiangthoute'n thumna in phawkzom lai ding in i kingen hi.

C. MANIPUR MISSIONS FIELD

KIPATHU GENNA LEH THUMNA DINGTE:

1. Manipur Missions Field a semtute'n Pathian ompihna toh amau omna mun chiat ah nidang bang in semthei kei mahle uh amau hih theihkhomkhom in kalsuan zel thei uhi. Kipathu gen in, baptisna tang ding bangzah hiam omte'n buaina omlou a a tan theihna ding un thumpih ni.
2. May 03, 2023 buai kipatnung Chingkha ah mipi biakkkhawmna sutzoplouh a sawtpi a om nung in, Bialtu Pastor panlakna toh mipi biakkkhawmna January 14, 2024 in pannawnta uhi. Kipathu genna in, biakkkhawmna nuam leh lamzang saptuamte'n a neih theihna ding un thumpih ni.
3. Mr Robindro vuakliam a om, tuin hoih lam manohta ahihtoh kiton in Biakna ah kihel zouta ahihman in kipathugen in, a damsianгна ding in thumpih ni.
4. Awangjiri a Local Chairman lenlel Kamarjit kha thum paisa apan damlou a om tutan in hoihkhe zou nailou a om, leh Langol a Local Chairman lenlel Mr Joy taksa chau leh hatlouhna tuamtuam nei a kikem, amaute a damsiangnaphna ding un thumna ah phawk ni.
5. Pastor (Rtd.) Kh Ibobi Singh leng hatlouhna tuamtuam a neih ziaк in lupna ngak in kikem lel hi. A dinmun hoih lolou ahihman in saptuam mite'n thumna toh delhzui ni.
6. Thiyam Konjin a om Mr Birjit in Feruary 12, 2024 chiang in Dan Siangthou in koppih nei ding hi. Buailai ahihman in, hihbuaitu omlou a program lamzang leh lohchingtak a zat ahihtheihna ding in thumpih ni.
7. Manipur a lemna leh muanna hong om a, tangthupha zalentak a tangkoupih hong hihtheih nawnna ding in thumna in phawk ni. Semtute'n nidang bang in semthei keimahle uh a omna mun chiat ua ginomtak a gingtu muanhuai a hihzel theihna ding un thumpih zom lai ni.
8. Hun haksataka lak a field nuai a gingtute'n a thiltuahte uh tungtawn a Pathian muanhuaina leh kepbitna a theihchet semsem ua a khalam hinkhua uh a hong hoih semsemna ding in thumpih ni.

D. HOJAI MISSIONS FIELD

KIPAHTHU GENNA LEH THUMNA DINGTE:

1. Pathian ompihna toh tuni chiang Home Tuition tungtawn a i sepna lamzang in paizom thei zel hi. Kumlui in semtute'n naupangte lakah Bible chang Jesu pianna thu sinsakna hun manphatak in a na zang thei ua kipahhuai i sa mahmah hi.
2. Kumlui December kha sung in Hojai a Meitei khua mun thum; Udoipur Gochari, Rampur leh Mainapathar ah semtute'n kal a suankhiakna mun ua gingloulumite thumsakna nei in, amaute toh houlimna hun leng zangkhawm thei uhi. Manpha i sa a, semtute'n houlimpih khak a neihte uh lungsim a Pathian in na hon sepzom sakna ding in thum ni.
3. Semtute'n Khristmas hun a ginglou mi bangzah hiamte chialkhawm in Jesu hong pianna thute genpihna nei thei uhi. Tua hun a ginglou kihelte'n a thuzakte uh tungtawn a tunung chiang a houlimpih theih hong hih ua, gingtu hisa tenle khalam leh salam ah banglam hiam ah kikhekna a neihtheihna ding un thumna ah phawk zom ni.
4. Semtute leh gingtute banah sepna ziak a Hojai pansan a gingtu omte'n Fellowship centre Rampur, Hojai ah tunitan dalna omlou in Pathianni chiang in biakkhawmna neitheih zel ahihman un manpha i sa hi. Gahsuah leh lohching a fellowship neih a hihzel theihna ding in thumpih ni.

E. DIMA HASAO MISSIONS FIELD

KIPAHTHU GENNA LEH THUMNA DINGTE:

1. Pathian ompihna toh semtute chidamtak in kalsuan sunzom thei ahihman un kipahtu gen ni. Kumthak a Pathian deihna bang a kuhkal tak a hon sepzom theih ua, gingloulumite lak a tangthupha tangkoupihna lamzangtak a hon neihzom theihna ding un thumpih ni.
2. Tuition tungtawn a semtute kalsuanna leng lamzang in paihoih tou zel hi. Kipahtu gen in, naupangte lak a nasepna a gah kipahhuaitak muh hong hihtheihna ding in semtute leh a sepna mun a ginglou mite ading in thumsak zel ni.

3. Semtute'n thumna tamsem neih poimoh ahihman in Seppatni teng in thumkhawmna neithe i zel uhi. Tua lou in, Sunday Fellowship leng buaina omlou a neih zom tou theizel uh ahihman in manpha i sa hi.

F. GOALPARA MISSIONS FIELD

KIPATHU GENNA LEH THUMNA DINGTE:

1. Tuition Center tungtawn a naupangte lak a field a nasepna in masawn zel a, tuni chiang buaina omlou in Pathian pina leh makaihate toh paizom thei zel hi. Tuition Centre tungtawn a naupangte lak a Pathian thu chituh sawm i hihman in thumna in phawkzom zel ni.
2. Semtute'n khat-le-khat kal a kisukhattuahna leh maban pai dingdan tuamtuate kikupkhawm theihna ding in kalkhat in khatvei kithuahkhopna neithe i zel uhi. Hiai hunte ah, thumkhawmna leh maban pai dingdan kikupkhawmna hun a zangthei zel ahihman un manpha i sa hi.
3. Pathian in semtu inkuante chidamtak a kumthak mel a muhsak ziaq in kipahtu gen ni. A gamna sepna a tukum sung chidam leh lohching a hon sepzom theihna ding un thumpih ni.
4. Semtute tate a siamsinna ua hong lohchin zel ua pilna a hong khangzel theihna ding un thum ni. Ban ah, semtute'n a etkol lel uh tuition naupangte ading a thum in naupang a kibehlap zelna ding in leng thum ni.

G. KAMRUP DISTRICT A SEPNA

KIPATHU GENNA LEH THUMNA DINGTE

1. Loharghat Station a semtu Evan Daizachin in Toupa ompihna toh khua tuamtuate veh in, mite houlimpih in kalsuan zom theizel hi. Kipahtu gen in, Toupa ompihna tang a kumthak sung a naktak a pan hon lak a tangthupha puanzak a hong hihtheihna ding in thumna ah phawk ni. Mrs. Toramati Rabha-te nuta counselling neihpih theih a omte leh Mr. Moheswar Das leng Pathian thu houlimpih theih a omta ahihman in kipahtu gen ni. Amaute'n a

thuzak uh tungtawn ua hotdamna kichiantak hon ngah theihna ding un thumpih ni.

2. Evan Kaplun, Chaigaon Area a semtu in Pathian ompihna toh lamzangtak a kalsuan in, sepna maban chidamtak a sunzom theizel ahihman in kipathu gen ni. Rabha mite lak a sem ahihna ah, khuavehna leh amaute houlimpih a kalsuannate Pathian ompihna toh lohching leh chidamtak a kal hon suanzel theihna ding in thumpih ni. ■



DORCAS *Corner*

Kum 2024 kalbi nihna February damtak a muthei nawn ding a hon pipa Pathian min phat in Hondampa Jesu Khrist min manpha in chibai k'on buk hi.

“Amah a kipan pumpi tengteng kizopna chiteng sep ziak a lemtak a suktuah leh kizomkhawm a, hiang chih in sep ding dan bang a a sep chiang in pumpi a khang a itna ah amah leh amah a kilamtou hi” (Eph. 4:16).

Kipumkhatna kem hoih ni: Na khat peuhpeuh a khanlam manoh na ding in mihingte hinkhua ah kipumkhatna, kithutuahna a poimoh mahmah hi. Adiak in Khristian gingtute lak a hon kipumkhat sak tuh Kha Siangthou ahi. Huai Kha Siangthou pen in i kipumkhatna sung a kipan in a sep di bangtak in nna hon sem hi. Mihing lam a diktat zoh ziak hilou, sep siamziak hisamlou, thilhihte ziak hilou in, Pathian hehpihna ziak leh a chitnate ziak kia hizaw hi. Pathian thu in hon hilh bang in, “Diktatna a thilhihte ziak hilou, a chitna ziak a pianthakna a sawp in Kha Siangthou a thaksakna in eite a hon hondamta hi. Huai Kha Siangthou Jesu Khrist i Hondampa ziak in nakpitak in i tung ah a sungbota hi” (Tit.3:5-6). Kha Siangthou tuh i vek ua inkuan khat a honbawl tu ahihdan a chetna ahi. Pathian kha pi a om peuhmahte zaw, Pathian tate ahingal uhi. Lau a omnawn ding in sikha hihna kha

na tang uh ahi ngal kei a; ta hihna na tang uh ahi zaw. “Abba, Pa!” chi a i kikou Chiang in, Kha mahmah in eimah kha toh, Pathian tate i hi chih hon theisak hi; Huan tate i hihleh gouluahpihte i hi uhi; Pathian gouluahte, Khrist luahpihte i hi ua; a kiang a pahtawi a i omsam theihna ding a amah i thuakpih taktak leh (Rom 8:14-17). Kha in Pathian ta hihna hon pia, ‘PA’ chi a hon kikou sak, eimah kha toh Pathian ta i hihna hon theichian sak, Khrist gouluahpihte, amah vang a Pathian tate Kha Siangthou tungtawn a pumpi khat a omkhawm i hi chih hon hilh hi.

Kipumkhatna tuh bukimna leh Khrist batna chiamtehna ahi: Gingtute’n kipumkhat hinkhua khawllou a zat gige tup pipen a neih ding ahi. Kipumkhatna toh hinkhua zattouhna in lawmman thupitak masuan i hi chih mangngilh kei ni. Kha in hihtheihna chituamtuan hon piakte Kha siangthou lamkaihna toh i sepkhiak Chiang in Khrist batna a khang in i omthei a, huan mihing bukim Khrist ziaq in i suakthei hi. Huan khenkhatte Sawltak hiding in, khenkhatte zawlnei hiding in, khenkhatte Tanchinhoih gending in, khenkhatte Pastor hiding in, khenkhatte Sinsaktu ding in a pia hi. Hiai misiangthoute thopna ding, nasepna sepna ding, Khrist pumpi lamtouhna ding in. Huai tuh ginna leh Pathian Ta theihna lam a thukituak a, piching a, Khrist tangchinna bang a i vek ua i om masiah a ding ahi (Eph.4:11-14). Khrist tangchinna ziaq in ginna a kithutuak a omte piching bang a seh ahi. Pastor ka hih leh Pastor hihding bang in ka sem hia? Sinsaktu ka hih leh sinsak ding bang in ka sinsak hia? Huchibang zel in eimah a Kha thopna piak a omte Khrist batna leh deihna bang gahkhia a i sepding leh i khan ding ahi. Khrist nungzui, amah toh kizopna chidam a omte Jesu theihna leh pilna a khang in, i hinna ah Khrist hinkhua a kilang khe ding a, huan, kipumkhatna a khang in ginna ah i kibulphuh kip ding hi. I kipumkhatna a hatsem leh Khrist batna nei in amah ziaq in bukimtak in i hinkhua ah a min a thupi semsem ding hi.

Kipumkhatna Pathian thilhihtheihna tuakhakna ahi: Tupna tuh hinkhua ading in khawl (engine) thilhihthei hon hektu a hi. I thiltup in i kiheina ding lampi, a masa ding leh nanung ding, sepdindan lampi hon kawkmuh in a khawl toh kizom pah hi. Tup kichian a omlouh Chiang in nasepte veina omlou in duhthusam

a tungzou kei hi. Nasepna om mahleh lohching taktak zoulou hi. Huan siamna om mahleh phatuamtak in kizangtheilou hi. Electric bulb a om a, himahleh a vaktheihna thilhihtheihna toh a kizop kei leh vak tuanlou hi. Himahleh Ni (Sun) thilhihtheihna genzual le'ng limlang thilhihtheihna nei tawn a avak i khohsak leh singteh nasan kang thei hi. Tuabanah, a ni (Sun) vakzung naideuh in koih lai le'ng sik nasan kang tan thei khop in a thilhihtheihna ahah hi. Gingu masate'n a tupte uh poimoh ngaih in sem tenten uh a, a result hoih in Pathian thilhihtheihna thupitak toh kituak hi. Huchiin, Pathian thilhihtheihna tuh Saptuam khanna ah kilang pah in, Setan nasepna douzou in, dingtang thei uhi. Anania leh Saphirate nupa in Kha Siangthou khem dia a kisak lai un, Sawltak Peter in hangsan tak in a thilhih uh diklou ahah dan gen in, a gamsum uh a iim gukziak un sihloh hial uhi. Hiai thu za saptuam mi kuapeuhmah in lau mahmah uhi (Nas.4:32-5:11). Pathian thilhihtheihna i muh leh tuahkhak theihna ding in hunnuam leh kipah hunte sang in tup leh ngim i neihte i sepkhiaakna a hun haksa leh i lungkiak mahmah hunte ah muhtheih in omzaw hi. Tua Pathian thilhihtheihna i hon muhchiang chiang in lungsim kipahna leh khalam vualzawlna hon tun hi.

Khristian gingu'ntu'ng kipumkhatna kha khat a i neihkhawm chiat ahi. Sawltakte kia hilou, Heutute kia hilou, gingu tengteng kipumkhat i hi chih mangngilh kei ni. Itna a kipumkhat a bulpipen leh tuppipen ahi. Lungsim munkhat a omkhawm tuh thil bangkim a kithutuak a khaugui bang a kizop tuahna ahi. Saptuam a gingu masate lungsim munkhat leh ngaihtuah munkhat in a om ua, a thil neihte nasan uh a kikop uhi. Nop na tel in chia! A lakuah tasam leng a om kei ua, kihazatna leng omlou in amau deihdong ching hunchiat in a hawmchiat zel uhi (Nas.4:32-35). Mihing lam ah kuhkalna suah in salam chidamna bang i neih chiang in lungmuang leh khamuang a om theihna dan a om sam hi. A hihhang in, niteng hunteng in tuabang hithei gige lou hi. Kuhkalna leh Khamuanna Pathian in mihing piak bang hilou in Khrist Jesu ah lungsim munkhat leh ngaihtuahna munkhat pu in hon omsak thei hi. Huchi a, lungsim munkhat leh kituaktak a Toupa Jesu Khrist Pa, leh Pathian i pahtawi theihna ding in

ahi. Hiai bang a kipumkhatna Kha Siangthou in mimal, inkuan, saptuam leh gamsung ah na hon sem henla, a itna sung ah Kha khat a kipumkhat ding in Pathian in hon vualzawl chiat hen.

DORCED HUHNA: TBCD, EBCC Tuilakzang in Dorced huhna Rs 1,500/- honpia uhi. Toupa'n a tamsem in vualzawl hen. ■



YOUTH *Corner*

"Gam leng amah a kidou leh, huai gam a dingkhe theikei ding hi. Inkuan khat leng amah a kidou uleh, huaite inkuan a dingkhe theikei ding uhi." Mark 3:24-25

Khathak a honpi galkai a tuni chiang dong hon ompih leh makaih tawntung i biak Pathian min phat in thupina amah ipia hi. Koimun peuh a om hiai Khristian thukizakna simtu tengteng itna chibai ka hon buk hi.

Inkuan ah, khotang ah, pawl/organisation tuamtuam ah dinmun hoihtak i neihna ding in i hihtheih dan chiat in lam chi tuamtuam ah pan lak theih tawk in i la ua, himahleh lohchinna taktak muh ding omlou bang hi. Gintu kichi hang a thumlou maw chi le hang nak thum lua, semlou maw chi le hang nak sep lua, thamlou in ei hihtheihna tan a nak pan lua himahleh vuaksuak zel. Bangziak ahi dia? Kipumkhatna omlouh ziak ahi. Khristian inkuan tampi puksia in lohsum uh, bangziak ahi dia? Aziak tuamtuam om kha maithei. Himahleh a bulpi pen hi ding a gintak huaipen tuh inkuan sung a kipumkhatna omlouh ziak hipen ding a gintak huai ahi. Organisation/pawl tuamtuam a heutu leh makai laisiam leh piltaktak i nei ua. Himahleh, i pawlpi uh mipite adia muantak leh kingakna tak a hihlou uh bangziak ahi dia? Heutute lah hoih ua, fel ua, kizen ua, siam leh pil zomah ua, koimah a chitlouhna leh demna ding i nei kei, a lohchin louhna leh khanlouhna bangdang hilou in khat-le-khat kikal a kipumkhatna omlouh ziak hizaw ahi. Gam khatpeuh ah vanzat, siamsinna, leh poimoh teng om mahleh

hiai kipumkhatna omlou gam pen amah kia a hat leh ding chih om ngeilou ding ahi. Mihingte leng i pumpi ua kahiangte kipumkhat kei leh ki khang in kilian, piching ngeilou ding i hi.

Ahiehleh Kipumkhatna kichi bang ahia?

Kipumkhatna tuh nam khat, mihing khat khanna leh bawlna ding a alaigil ahi: Genesis 11:1-6 “Huan lei a mi tengteng in pau khat leh paudan khat a nei uh. Hichi ahi a, suahlam a kipan a kisuanzel laiun, Sinar gam ah phaizang a mu ua; huai ah a tengta uhi. “Kisa un; teklei i bawldia, hoitak in i halding” a kichita uhi. Suang sik in teklei a nei ua, suanghukna sik in longnai a nei uhi. “Kisa un, khopi i bawl dia, insang a vum vansun ding in i bawl dia, i min i thang sak ding uh. Huchilou in zaw lei pumpi ah thehdalh in i omkha ding” a chi uhi. Mite tate’n khopi leh insang a lam uh en ding in Toupa a hohsuk hi. Toupa’n “Ngai dih ua, mite pumkhat ahi ua, avek un lah pau khat a nei ngal ua; hiai thil a hih pan uhi. Tu’n zaw a thil hihtupte uh leng kham vual ahita kei ding hi.” Hiai a mipi te leng pumkhat bang a kithutuak tak a a nasep uh khamvuallouh ding khop in hat uhi, thilkhat peuhpeuh ah kipumkhat in kithutuak leng hon dal, nang zou omlou ding ahi, huaimah i khanna ding a poimoh leng hong hi ahi.

Kipumkhatna kichi tuh vualzohna ding a poimoh mahmah ahi: Mark 3:24-26 “Gam leng amah a kidou leh, huai gam a ding khe theikei ding hi. Inkuan khat leng amah a kidou uleh, huaite inkuan ading khe theikei ding uhi. Setan leng amah kidou a, a kilan leh, a ding khe theikei ding a, a mangthang zaw ding hi.” Ei kia a ding khe thei ngeilou ding i hi, panpihtu, huhtu leh hanthawntu kipoimoh gige ahi, gamsung ah hi’n inkuan ah leng kipumkhat leh kituahna mah poimoh pen hi gige ahi.

Kipumkhatna in damna leh suahtakna hon tun hi: Nasepte 2:42-43 “Huan sawltakte thusinsakte sin in, kithuah in, tanghou balkham in, thum in, phatuamngaitak in a omkhawm uhi. Huan michih in a lauta ua: sawltakte’n thillamdang leh chiamtehna tampi a hih uhi.” I gam leh nam hitaleh, inkuan leh saptuam ah leng i damna leh suahtakna ding in leh, midangte hon maingal

leh muhsit a i om louhna ding in kipumkhat a tup kibang kalsuan kibang a i paikhawm poimoh ahi.

Kipumkhatna in Pathian mite leh unaute kituak diamdiam a hon omsak in nuam sak a, huai ah hinna om ahi: Sam 133:1 “Ngai in, unaute kituak diamdiam a omkhawm a nak hoih in, a nuam mahmah hi! Lu a thau manpha tak, khamul a luangkha, Aron khamul ngei a luangkha a, a puanaktual mong a luangkha bang ahi. Hermon daitui chim Zion tangte a kejel bang ahi; huai ah Toupa’n vualzawl na thupiak a pia a, tangtawn a hinna ding ngei.” Kituak leh kipumkhat a omkhawm nuam leh manpha, eikia ngalkhat gamtat bang a i om chian i kim leh kiang a miten nuamsa lou uh ahi. Huai kituahna leh kipumkhatna in midangte adia vualzawl na ahihna ding a ei midangte toh i kituah masak poimoh ahi.

Amos 3:3 “A sawm kei un mi nih a paikhawm ding ua hia?” Inkuan, khotang leh i minam sung hitaleh kal i suan khawm ua i ton dialdial theihna ding a kipumkhatna chi ituh ngai ahi. Pathian leh mihingte leng i tenkhawm theihna ding in i Toupa Jesun a lampi hon bawlsak in kimelmakna baang lai chimsak in a sisan leh sihna tungtawn in Pa toh hon kipumkhat sak hi. Melma Setan in i kipumkhat ding deih mahmah lou in i kikhenna ding in lam chi tuamtuam ah panla den hi. Insung ah nupa kikal bang, tate toh kikal, mou leh tekpi/tekpu kikal bang, khotang ah makai leh mipite kikal bang ah, michih in huai kipumkhatna i kepbite leh ven bit ding i mohpuakna ahi. Sawltaklian Paul mahmah in leng Ephesa Saptuam in huai kipumkhatna a pialsan ding laulua ahihman in Eph. 4:3 Lemna Kha a kipumkhatna vom chinten ding in, chin hanthawn hi.

Sapte thupil in 'united we stand divided we fall' a na chi uhi. Thil khat peuhpeuh ah lohchinna ding in kipumkhatna poimoh hi. Kimawl mite lungsim munkhat a hong kipumkhat in tup leh kalsuan hong kibat chiang in vualzou jel uhi. Taksa leh pumpi ah leng hiang tuamtuam om mahleh tua hiang te pumpi khanna ding a nasem hivek uhi. Tup leh ngim tangtunna ding, i khantouh leh lohchinna ding in kikeituah lou a kipumkhat leh lungsim munkhat a kalsuan khawm tulai khovel ah poimoh mahmah ahi. Kipumkhatna toh kalsuan khawm ding in Toupa’n hon vualzawl hen. ■

DOTNA LEH DAWNNA

Laisiangthou (Bible International) in Paite pau azat thumal kitaklang **anuai kigitte** bang genna ahi hiam chih hon hilhchian lechin kipahhuai mahmah ding hi.

Dongtu: Upa J. Kaikhanmang Guite, Vengnuam.

Dawngtu: Rev Thawndouliau, Director of Ministries

○ **Dotna 1na:** Laibu: Late La

Bung 1: 5,6- Sakmel **puanbang dum**

1: 6 - **mohlung** hongpaih

1: 9 - kangtalai kai **kolsala**

1:10 - **bengbil** na bah

Bung 2: 4- **puanlap lah katung ah anbang itna** -

2: 11 **tunsik vuksan** beita.

Dawnna: Hiai a dotna hong kibawl te mituamtuam akidot nung leh Bible tuamtuam te ki-en kawm in muh dan leh theih dan in gen chetna hon kibawl hi. Translatorte gendan in Bible International India Society te adeih dan in hiai Soloman Late Poetry ahibbang in Lapau deuh mah in kilet thei leh hoih ding ahi achih ziak ua, lapau mah zang a ahong kilet ahihman in khenkhatte ading in haksa maithei mah ahi chih dan ahi. Hiai mah B.I ten akipah pih mahmah uhi. Huai ziak in Lapau a i neih khak louh khenkhat Lapau dan ahon bawl uh leh diklou ade aw chihna bang ahong om thei hi.

1. Late Bung 1:5,6 - sakmel **puanbang dum** = Melsia genna or vom genna ahi a, Ka mel puanbang in dum/vom mah leh ngaih baang veve ka hi. (ka sakmel hoih louh puan bang a dum/vom) (Teddin & BSI Laisiangthou ah tuh dum kichi pen Vom akichi hi).
2. 1:6 - **mohlung** hongpaih = simmoh bawl or mohpaih genna ahi. (Teddin Laisiangthou ah gawtbawl chi hi).

3. 1:9: kangtalai kai **kolsala** = Sakol genna ahi = Paite Lapau mah ahi.
4. 1:10: **bengbil na bah** = Bilbah genna ahi. Suangmantam bilbah abat kilawm sa hi ding dan ahi.
5. Bung 2:4: **puanlap lah ka tung ah anbang itna** = Puanlap kitak khia bang in a itna lak khia genna ahi.
6. Bung 2:11: **tunsik vuksan** beita = Phalbi bei ta genna ahi.

Theih dia hoihte:

1. Sakmel puanbang dum = Paite Lapau a omlou ahi- Translator ten ahon phuah uh hidin kigingta hi.
2. Mohlung hong paih = Paite lapau mah ahi.
3. Kolsa la = Paite lapau mah ahi. Sakol genna ahi.
4. Bengbil = Paite lapau mah ahi.
5. Puanlap lah ka tung ah anbang itna = Puanlap kitak khia bang a hon itna langkhia.
6. Tunsik vuksan = Phalbi bei ta gen - Paite lapau mah ahi.

○ **Dotna 2na:**

a) **Bishop leh Dekon (deacon himai thei):** Paite Laisiangthou lettu tamzaw in azatlouh uh kia hilou a Saptuam mi tamzaw in ahihna leh kizatna i theihshiam khollouh thumal “**Bishop, Dekon**” chih Laisiangthou (BI) in honzatte (Nasepte 20:28; 21:8; Filipite 1:1 adg) ei Saptuam (EBC) *kizatdan ah bang pentoh kituak ahi hiam* chih gentelna neih tuak ahi. Himahleh, Laisiangthou lettu masaten thumal azat bangbang uh kizatpih mai dia hoih ahi, simtute khualna in.

Dawwna: Hiai a dotna or thukupna hon bawlte kipahpih huai ka sa mahmah hi. Laisiangthou lettu masaten kammal ana zatte uh kizang khawm tou theivek zel leh deihhuai mah ahi. BI a pen ei ading in Version khat ahong suak a kongkhat ah kipahpih huai ka sa a, Bible gelh masate toh etkak theih dia aomman in phatuam ka sa hi. Huan Thumal “Bishop” kichipen ahihleh BSI in a gelhna ah Heutu achi a, huan Dekon ahon chih nawn pen ahihleh BSI ah Upa chin akilet hi. Ei Saptuam in izatdan uh hiai dan ahi:- Bishop, Elder leh Deacon kichihna munte ah

Upa, Heutu chih in i zang kop uh. Bishop pen = Ordain Pastor ahih hang a Pastoral Ministries akizang kha loute genna deuh Kivaihawmna lam na sai deuhthe genna in i nei uhi. Huan Elder i chihnawn chian taksa kum upate bang, Saptuam Upa ordainte ban ah Pastorte genna in kilet khe zel hi. Deacon = tuh Saptuam Upa i chihthe genna a i zat uh ahi chin heutu masa lam ten hilh chetna na bawl zel uhi. EBC Ordain chi nih i nei ua huaite tuh Pastor leh Upate ahi uh.

b) Hosia 13:14 na toh etkak (reference) dia kipia **1Kor.5:55** kichi pen kituaklou abang na e, ***I Korinthte bung 5 ah tang 13 tan kia om a ...***

Dawna: Hiai a Reference kipia gelh khelh ahi - I Kor. 15:55 chih ding pen na gelh khial kha uh ahi ve. Reference aban a kipia leng na en suak lechin 15:13 dipen le kilehbulh kha ahi. Bible sutnawn chia bawldiktuak di mah ahi.

c) Kolosate 2:6 **“Toupa Khrist Jesu na Toupa ua na, amah ah nungta gige un”** chih thu kimlou ahi ding e, ***bang gen ut ahia chih kithei theilou ahi.***

Dawna: Gelh kimkhak louh or maihkhak om ahi, hiai dan a sim ding ahi **“Toupa Khrist Jesu na Toupa ua na kipahpih bang un, amah ah nungta gige un”** chih ding ahi.

d) Kilakna 2:5 **“... na pukna mun *asanna* thei gige in!”** chih ah ***asanna*** leh Kilakna 18:6 **“*Azulehbulhna* nou ah,”** chih ah ***zulehbulhna*** chih thumalte bang genna hi ding ahia?

Dawna: Kilakna 2:5 na a na pukna mun *asanna* thei gige in BI in achih pen BSI in na pukna laitak thei gige in achi hi. Hiai ten hon muhsak tuh apukna san leh apukna mun theih gige ding hi tuak hi. Huan Kilakna 18:6na a *Azulehbulhna* nou achihna a *zulehbulhna* kichi BSI a pen i sim leh chiangkuan in ka thei hi, amah gamtatna alehni in thukkik un achi a, huai tuh lehbulhsakna anasepte chinuam ahi ding.

Hiai teng khawng dan in i kihilhchian a i theih siam louhte uh kidong tuah zel leng uthuai ka sa hi. ■

Reports

EBC RELIEF & REHABILITATION ACTIVITY REPORT

Tunai a relief & kitundingna nasep toh kisai a Saptuam panlakna khenkhat hai ah i taklang nawn ding.

1. Relief Sub Committee in kumlui December 1, 4, 5 in Imphal apan gamsung buai ziak a hong taikhia Saptuam mi khosak haksia diakte houlimpihna (interview) nei in Kitundingna toh kisai in huhna piak theih di'n anuai abang recommendation bawl hi.

Sl.	Project/ Grant	Genchetna	Hamphatpih Inkuan & Budget	Estimated cost (amount)
1.	Naomi Bawkta	Nekmuhna kichian neilou Meithai haksia diakte inn ding bawlsak	5 [@1,60,000/-]	8,00,000/-
2.	Zodawn Bukta	Zodawn khua a khosak kipan thak utte huhna piak ding	1 [@50,000/-]	50,000/-
3.	Khopi Bukta	Lamka & akim ah inn lianlou kibawl utte huhna piak ding	9 [@50,000/-]	4,50,000/-
4.	Inkuan Tundingna Loan	Nektawm muhna dia sep ding neite huhna (loan)	16	4,43,000/-
5.	Inkuan Grant	Tuletu a poimoh kin neite huhna	6	96,000/-
6	Ginna Kalbi	Inluah a kibulpat utte inluah man hunchiam sung piaksak ding	26 [@65,600]	3,93,600
Estimated Total				Rs. 22,32,600/-

2. Naomi Bawkta kibawl inn 5te zoh ahih toh kiton in January 16, 2024 zing 7:30AM in mun 4 ah Pathian khut a latna leh aneitu ding khut a piakkhiakna neih in om hi. D. Leikot ah Bawkta 2 kibawl a, huai ah intek saptuam in EBCC Vaal Veng leh EBCC Pethuel hong pang uhi. Kanaan ah Bawkta 1 kibawl a EBCC Kanaan in intekna la in, Peniel ah Bawkta 1 EBCC

- Peniel intekna in, leh Khominthang ah Bawkta 1 mah EBCC Khominthang intekna in kibawl hi.
3. Imphal a om Anal Baptist Church in awlmohna liantak toh galtai haksatna tuakte huhna ding in sum tamlou (amau deihna bang a taklat louh mai ahi) Mr. Thianlal tungtawn in hon khak uh a, inkuan 15 telkhiakte kiang ah December 29, 2023 in piakkhiakna neih ahi. Toupa'n thumsaktu ding leh deihsaktu ding hon piakte ziak in i kipak mahmah hi.
 4. Relief toh kisai in Division Quota (antang) a 4veina kihawm khinta hi. Saptuam mi nektak haksatna tuak tamtak omte' taksap huksakna ding in Division office tungtawn in relief antang (aman niamzaw zek in) kihawm thei zel a, tu'n a 4veina hawmzoh hita hi. Tutung in LSD (bag 400), LND (bag 200), Singngat (bag 150) leh Thanlon (bag 100) kiban zou lel hi. Saptuam mi nektak haksatna tuakte dawn zangna leh khotuahna ding a naktak a panla gige tualsung Saptuamte leh Division-te tung ah kipahna lian mahmah hi.
 5. October 2023 kha sung a Relief Thohlawm hong kipekhawmte tuma in (January 2024 issue ah) hong kitaklang hi. Huai ah EBCC Central Lamka maihkhak a om poi akisa. Record ah bawldik ngailou in adiksa ahi chih k'on zasak uhi.



EBC Innsung Thu

EBCC Songtal Chialpina: EBCC Songtal in Chialpina January 12-14 sung nei ua hiai hun ah Rev Kamchinkhup Director of Missions in thugenna hun zang hi. Hiai chialpina hun in Saptuam mipi a neu a lian kisit omlou in kitel in biakin bang kidim zou gige sim; thugenna hun 6 ahi. Hiai hunsung in Saptuam a department tuamtumte toh 'Departmental Joint Fellowship' hun leng zat in om a manpha mahmah hi. Chialpina Pathian ompihna toh manphatak in kizou thei in, a kilanthak leh Jesu Khrist lal leh Hondampa dinga sang thei bang leng hun khop om hi. Program lohchingtak a hon zousak Pathian kia in thupina tengteng tang hen. ■

Thu Tuamtuum


Kipah Thugenna:

Mr. Muansang Mangte s/o Rev. Dr. Khamkhanchin in SSC nuai ah Postal Assistant muthak a, Kerala State ah dated 04/12/2023 in joint ta hi. Toupa, sepna hon pepa min phat in. Kipahna latsakna in Missions Department nuai a Nektakzonna Dohkan Pulpit kichi Toupa gam nasepna dia zang nuam in, kha loh lak masak pen Toupa gam nnasep na a zat ding in hon khak hi. Toupa'n a sepna ah makaih in ompih jel henla, honglohchin touh jel i deihsak mahmah hi. ■



Ordain Sunna

1. Min: **UPA H THAWNZAGIN**
2. Pianni: April 15, 1946
3. Pianna Khua: Parvatawm
4. Pianthak Hun: A Naupan lai
5. Baptisma: Tang
Baptistu: Pastor Dawnkima
6. Pa Min: Thawngzathang Hangshing
7. Nu Min: Ngemkhodon Tonsing
8. Zi min: Zenkhodon
9. Kitenni: December 11, 1969, Kitengsak tu: Pastor T Lamgin
10. Gil a gah goutan neihzah: 5, Pasal: 3, Numei: 2
11. Tu melmuh zah: 9, Pasal: 5, Numei: 4
12. Tulel a omna Saptuam: EBCC Dorcas Veng
13. Tulel a kizatna: TBUC Member
14. Ordain Kum: Dec. 13, 1998
Ordain Petu: Rev. L. Kham Kho Lun
15. Pahtakna lai san kum: 2015
16. Toupa kiang a tawldam ni: 27-12-2023 Vui ni: 27-12-2023
17. Natna/Damlouhna: A tuamtuum kigawm
18. Vuitu Pastor & Saptuam: Pastor Dr. Tunson Tunglut, EBCC Dorcas Veng



19. Saptuam a kizat khakna: ECC/EBC Thanlon, KTP(BYF) Founder Secretary, 1974 Naupang heutu (KNP), 1976 – 1978, Building Committee: Local Committee, School Committee: EBCC Dorcas Veng: Member TBSUC Chairman Tualsung Mission Committee: 2002 – 2005, Dorcas Committee Adviser: Kum khat Membership: GBC & BSI Patron Member ahi.
20. A tanchin gelhbeh tuak sakte: March 1980 kum in Electric/Power Department, Manipur Government nuai ah Sweeper nna mu in, Thanlon khua ah sem a, a hihtheih khomkhom a gin-om leh chitak tak a asep nung in 2015 kum in pension hi. Damlouhna leh sepna ziak in 1999 kum in Thanlon apan Dorcas Veng, New Lamka ah pem uhi. A mizia ah mi pautamlou leh kamsiam lua hilou napi in lawmngai mahmah mi ahi hi. Mi taima, nnasep hat leh kuhkal ahi a, a gensate leh abul apat vanglakte guitun leh tangtun sak sawma chitaktak a pang teitei mi ahi hi. Mi kidekzou leh kingainiam mi ahi a, a tunna leh phakna chiang chiang a kipak tak a pomthei leh lungkim thei mi ahi. Saptuam leh khotang a akizat khakna te ah leng amah-leh-amah, “Sing omlouhna a gua kizang” a ki chisek hi. Innkuan kikhop a ngaihpoimoh ban ah lasak leh lenkhop lunglut in nuamsa a, lungleng thei tak leng hi in khuang leh sialki te tum a amah kia ale lengkhawm khawm thei mi ahi hi. A leitung khualzinna lampi ah damlouhna chituamtuum tuak sek in- gultuk, mom leh gulchi keih, ban ah sungna te na tuaktou a, kum 1998/99 in leng khuak lam ah buaina nasatak hon tuak mah leh Pathian hehpihna ziak a damna ngah in Pathian tung ah kipak mahmah hi.
- Kum 2013 a kipan in Cardiac Obstructive Pulmonary Disease (COPD/Tuap natna) hon neipan a, kikem toutou a omlai, 2015 kum in agil ah Abdominal Aortic Aneurysm (AAA/sigui pipen bawklian) muhkhiak in om nawn hi. Tua a sigui a bawkompen 2000 kum in GB Pant Hospital, Delhi ah operation neih in om a, a sigui sung ah Stent (sigui bawltawm) thuahsak in om hi. Kidawm siamtak leh pilvangtak a ki-enkol tou liailiai a omlai, June 2023 akipan in Thromboangitis Obliterans hon nei leuleu a, a khe a siguite ki block in kongpua kankhe zounawnlou hi. Etkol theih dandan a etkol himahleh awl awl a hong keniam hiai hiai in, hiai tan dinmun ahong tung hi. ■



Kipahthu Genna THUMNA MAKAI

FEBRUARY 2024

1 NINGANI: Khathak a honpi galkai Pathian tung ah kipahtu genni. Pathian vualzawlina toh tukha manpha tak a i zat theihna ding Toupa mai ah kilan thak ni. Zingchiang 2-4 sung in EBCC Singngat in Hotdamna Chialpi nei ding ua, Evan Lianding Guite thugentu in pang ding, camper te, camp vaisaite Pathian Khasiangthou kithuapihna toh lohchingtak a a zohtheihna ding un thumpihni

2 SINTAWPNI: Tuni apan date 4 tan EBCC Gilgal in Chialpina nei ding ua Evan N Thangsuanpau thugentu in pang ding, camper te, camp vaisaite Pathian Khasiangthou kithuapihna toh lohchingtak a a zohtheihna ding un thumpihni. Hiai hun toh kituak mah in EBCC Mualnuam in leng chialpina nei ding ua, Rev Kamchinkhup, Director of Missions in hun zang ding thumpihni.

3 KIGINNI: Tuni in EBC Saptuam pumpi in thumna hun zang ding LSD leh LND in Centenary Hall, New Lamka ah zang khawm ding ua, Division dangte leh Khopi Saptuam in bel amau lemtang bang in zang ding uhi. Thumna manpha leh gahsuaah ahihna ding in Pathian kiang ah lanthak ni.

4 NIPINI: Tukum in i saptuam department tuamtuum a semtute kisan kual uhi, kisuankha semtute'n amaute omna dingmun tungkim chiatta ua, lamzang leh gahsuahtak a hon sep theihna ding un thumpihni.

5 SEPPATNI: Division thak bawl ding toh kisai in nasep paitou lel, lamzangtak a sepsuaah ahihtheihna ding in study team te thumpih ni.

6 SEPNAWNI: Zingchiang 7 - 11 tan ZBA Vanglai (Burma) ah Chialpina zang ding ua, Evan. T Damkhothang in thugenna hun zang ding, Pathian Khasiangthou kithuapihna toh chialpina gahsuaah hong hihna ding in thumpihni.

7 NILAINI: Tuni apan date 9 tan BDC New Lane in Hotdamna Chialpi nei ding ua Evan. Lianding Guite thugentu in pang ding, chialpina vaisai leh a tel dingte Pathian Khasiangthou kithuapihna toh lohchingtak a a zohtheihna ding un thumpihni

8 NINGANI: Zingchiang 9 - 11 sung in EBCC Phaitong in Chialpina sai ding ua Rev Kamchinkhup, DMs thugentu in pang ding, chialpina vaisai leh a tel dingte Pathian Khasiangthou kithuapihna toh lohchingtak a a zohtheihna ding un thumpihni.

9 SINTAWPNI: TBDC leh DBDC in term thak ading in mohpuakna lata uhi, amauten Pathian deihna bang a numei lak leh saptuam adia lohching leh gahsua tak a hon sepkhia theih na ding un thumpihni.

10 KIGINNI: Gamsung buai ziak a mipite khosakna naktak in hon sukha, thamlou in a bik in IDPs te maban leh khosak a patnawna ua Pathian pina leh makaihna ngen in thumpihni.

11 NIPINI: Central Music Sub-Committee in tulaitak in Pathian Ngaihla Solfa thua in nasep tha it mahmah ua, Hoihtak a hon zoh theihna ding un committee te thumpihni.

12 SEPPATNI: Relief leh Rehabilitation te panlakna in gamsung buaina in a sukkhakte lak ah meithai mi 5 te a ding a Naomi Bawka kibawlsak luahtheih in om ta hi. Hiai bang a nasep hoih leh manpha i septheih Pathian ziak in kipahtu genni, a luahtu ten khantouhna leh masawna hon neihna uh hi ding in thumna ah delhzui ni.

13 SEPNAWNI: Manipur Board nuai a pawl X exam lohching leh lamzangtak a zoh ahihtheihna leh result kipahtuaitak i muhna ding un exam pelel naupangte thumpihni. Zingchiang in tukum ading a masapen ding in CEC meeting om ding memberte Pathian ompihna ngen in thumpihni.

14 NILAINI: Zingchiang 15-18 tan EBCC Elim Veng in Chialpi nei ding. Evan. N Thangsuanpau thugentu in pang ding, camper te, camp vaisaite Pathian Khasiangthou kithuapihna toh lohchingtak a a zohtheihna ding un thumpihni

15 NINGANI: Tuni a kipan in EBC Saptuam School te admission kihong nawn ding a march 5 in class pan nawn ding, School hoihtak a hongpai zom jel theih a, sinsaktu leh sintu naupangte ading in thumpihni.

16 SINTAWPNI: Zingchiang 17-18 in EBCC Ngathal in Chialpina nei ding uhi, hiai hun in Rev Kamchinkhup Director of Missions thugentu in pang ding, chialpina vaisai leh a tel dingte Pathian Khasiangthou kithuapihna toh lohchingtak a a zohtheihna ding un thumpihni

17 KIGINNI: Pastor lakthak a om mi 4 te tulel a Sawltak nasem a omte Evangeliste toh kizui in chialpina leh campte ah kizang lel ua, training hoihtak leh manphatak hon neih na ding un thumpihni.

18 NIPINI: Zingchiang 20-25 sung EBCC Kangkap in Camp nei ding uhi, hiai hun in Rev. Kamchinkhup Director of Missions thugentu in pang ding, camper te, camp vaisaite Pathian Khasiangthou kithuapihna toh lohchingtak a a zohtheihna ding un thumpihni.

19 SEPPATNI: Zingchiang 20-25 sung in EBCC Khajang in Pasal Camp sai ding ua, Evan T Damkhotang in thugenna hun zang ding, camper te, camp vaisai Pathian Khasiangthou kithuapihna toh lohchingtak a a zohtheihna ding un thumpihni.

20 SEPNAWNI: February 24-25 in EBCC Shillong in Saptuam Silver Jubilee program hun zang ding. Rev. Dr. S Vung Minthang, General Secretary EBC in hunpi zang ding, program manpha leh lohchingtak a zoh ahihtheihna ding in thumpihni.

21 NILAINI: Zingchiang 23-25 sung in EBCC G Bualjang in Hotdamna Chialpi sai ding ua, Evan Lianding Guite thugentu in pang ding, camper te, camp vaisaite Pathian Khasiangthou kithuahpihna toh lohchingtak a a zohtheihna ding un thumpihni

22 NINGANI: Khopi a om i saptuam mipi tamlouchik te leh amaute kemtu leh enkoltu Pastor leh Upa te Pathian kha thopna leh makaihna ngetsakni.

23 SINTAWPNI: I Missions Fields te leh pawl tuamtuam te toh Toupa gam nasepna in masawn in pai thei zel. Pathian kiang kipahthu gen in mailam ah leng Pathian khasiangthou thopna leh makaihna tungtawn a Toupa gam keklian leh khamangthang tamsem Jesu khebul hon tut theihna ding un thumpihni.

24 KIGINNI: Beth Haran Hostel a bik a semtute tate kepna ding dormitory kibawl beh, naupang 40 vel om thei ta ding a ngim ahihman in hoihtak a zoh ahih theihna ding leh huai a naupangte kemtu warden leh naupangte thumpihni.

25 NIPINI: Rev Dr Gin Neithang hun bangtan hiam a kipan in taksalam hatlou ziak in damdawi toh ki-enkol tou den ahihmanin Pathian apan damna leh hatna ngetsak ni.

26 SEPPATNI: Gamsung buaiziaik in Toupa gam nasepna a thilpiak lam naktak in hon sukha hi, himahleh tunitan pha in khollou a thilpiak hon pe zom jel te ziaikin kipahthu gen in Toupa gam nasepna a paizom jelna ding in thumni.

27 SEPNAWNI: WEC tungtawn a gamdang a kuan khia i missionary ten pausinna, midangte toh kimmel theihnuahna leh lam tuamtuam ah nasep kisan mahmah ua, amaute taksa leh lungsim chidamna ngetsak in thumpihni.

28 NILAINI: LRRC Tungtawn a khamtheih saltangte ading a salam leh khalam a suahtakna nasep tuni tan in paitou thei lai hi. Huai a inmate a omte leh a kemtute chidamna leh Pathian ompihna ngen in thumpihni.

29 NINGANI: Tuni kha beini tan a honpi Toupa kiang kipahthu gen in i sep khelb bawl khelb omte ziak in thupha tawi ni. ■

Postal Regd. No. MNP 07 | Regd. No. 22344/70

BOOK POST



If undelivered, please return to

The Editor,
CHRISTIAN THUKIZAKNA
P.O. Box-6, Dorcas Hall,
New Lamka-795006, Manipur, India
